

NZAMBE AZALI KOMITALISA POLELE NA BILEMBO NA YE



Nakamwakaki mwa moke komona moninga na ngai, Joseph Boze, kuna, pe nabalukaki mpo na kozua ntango moke ya kopesa ye mbote ya loboko.

² Tózua sikawa Liloba na Nzambe, na Baebele, mokapo ya 1. Nalingi kotánga, eteni moko, molongo ya 1, ya 2 pe ya 3, mpo na kobimisa motó ya liteya ya mpokwa oyo.

Nzambe, oyo na ntango ya kala, azalaki kosolola na batata na nzela na basakoli mbala na mbala pe na ndenge mingi,

Na mikolo oyo ya suka alobi na biso na nzela na Mwana na ye, oyo atii ye mosangoli na libula na biloko nyonso, na nzela na ye azalisaki mikili;

Ye azali kongenga na nkembo na ye, azali pe elilingi na ye mpenza oyo etalisami, pe azali kolendisa biloko nyonso na liloba ya nguya na ye, esili ye. . . afandi na loboko ya mobali ya Nkembo kuna na likolo;

³ Tógumba mitó sikawa mpo na kobondela. Pe sikawa, Liboso na Bonzambe na Ye, soki ozali na lilómbo moko oyo okolinga koyebisa Ye, okoki kotombola bobele loboko, pe yango nde lilómbo na yo, ete Nzambe ako. . .

⁴ Tata na biso na Likolo, tozali sikawa koya liboso na ngwende na Yo, na nzela na kondima na Nkombo na Yesu Klisto, Mwana na Yo. Topesamélá elikya oyo, ete: “Soki tosengi eloko moko na Nkombo na Ye, ekopesamela biso.” Pe Yo oyebi ba-mposa na biso pe bosenga na biso, pe Yo olakaki ete Okokokisa nyonso oyo tozali na bosenga na yango. Na bongo, Tata, tokobondela ndenge Olakisaki biso: “Tika ete Bokonzi na Yo éya. Mokano na Yo ésalema na nsé, ndenge esalemaka na Likolo.” Ete lilombo na biso, na mpokwa oyo, ékoka kokokana na mposa na Yo ya kopesa yango, pe pesa biso matómbo oyo. Pakólá Liloba, Nkolo, pe balobi ná bayóki nyonso, pe tika ete Molimo Mosantu ákóta pe ázala mokokisi ya Liloba, na mpokwa oyo, kati na biso. Mpo tosengi yango na Nkombo na Ye. Amen.

Bokoki kofanda.

⁵ Nasosoli ete, lobi na ntongo, ekozala bilei-ya-ntongo ya ba-Hommes d’Affaires du Plein Evangile. Na momesano, esika bayanganaka, nazuaka litómbo ya koteya na bilei-ya-ntongo na bango. Kino na ntango oyo, yango ezali bobele ebongiseli moko, oyo ezali ebongiseli te, kasi, etónga bobele moko oyo na—

nazalaka moko na yango, ezali ba-Hommes d’Affaires Chretiens. Na boye nateyaka mpo na bango, na mokili mobimba.

⁶ Sikawa, na mpokwa oyo, totii motema ete liyangani oyo ekozala mpamba te. Nayezi epai na bino, ya kolemba, mongongo elembi, pe nazalaki na mwa kosú-kosú, longwa na . . .

⁷ Nauti na Tucson, esika mopepe ezali mpenza malamumu pe ya kokauka, bongo nayezi awa pe ezali mpenza malamumu pe máimái, boye bokeseni ezali mpenza. Soki bino nyonso bokamati mai nyonso awa, soki botindi yango na ngambo na biso, tokosepela na yango mingi. Kasi, na bosóló, bokokoka kosala yango te.

⁸ Kasi nakoyebisa bino likambo moko, ezali na lisepe moko kuna. Biloko na—na—na biso nyonso na Arizona, ba-nzete na biso, etondi na ba-nzúbe. Biloko nyonso ezali na nzúbe. Ezali mpo ekaúká. Sikawa soki nzete yango moko ékólaka awa, elingaki kozala lokasa moko ya kitoko mpenza. Bomoni, ezangi nde máí, yango wana ekómi nzúbe.

⁹ Pe ntango lingomba ekómi kozánga Máí ya Bomoi, ekokauka pe ekokóma lisusu na nzúbe, kotúbáká pe kotobóláká biloko nyonso. Kasi esika máí ya Bomoi etiolaka, efungolaka lokasa pe ekómisaka yango pete-pete, sembe-sembe ná bopolo, búlee pe endimamaka na Nzambe. Na bongo tika ete Nkolo Nzambe ápesa biso mai, na mpokwa oyo, mpo tókóma ba-nzúbe te; kasi tózala nkasa ya kitoko, esika oyo batomboki bakokoka kofanda na nsé ya nzete yango, na malili, pe kozua kimia na milimo na bango.

¹⁰ Sikawa nalingi kozua motó ya liteya, na mpokwa oyo, soki Nkolo alingi, nazali kopusa mwa micro oyo penepene na ngai, mpo mongongo ekauki. Nalingi, kouta na litángi oyo na Baebela 1:1, nalingi kozua motó ya liteya: *Nzambe Azali Komitalisa Polele Na Bilembo Na Ye*. Tika názongela yango lisusu, mpo nayezi ete biyokiseli ya mongongo ezali malamumu te awa. Nzambe Amitalisaka polele na bilembo na Ye.

¹¹ Sikawa, makambo mingi etalisamaka polele na bilembo na yango. Pe nazali na ndambo ya Makómi awa oyo nako . . . pe nkomá, oyo nakosalela. Sikawa, elembo ya eloko nyonso etalisaka polele nini yango ezali.

¹² Sikawa, lokola na bozalisi nyonso, ba-fololo eyebanaka, mbala mingi, na bilembo na yango. Soki ezali ya kokokana mingi, lolenge moko ná mosusu, elembo ya fololo yango ekotalisa polele oyo fololo yango ezali. Bomoi ya ba-nyama na zamba, mbala mingi . . .

¹³ Na—nazali moí-bokila. Osengeli koyeba elembo ya nyama oyo ozali koluka koboma, soki te ntango mosusu okoki kokósama mpenza. Ndakisa, lokola Mpate-ya-Ngomba, kuna, na Colombie Britanique. Na automne euti koleka, nazalaki na nsé ya engumba Yukon, bandeko mibale to misato bazali awa sikawa, bazalaki elongo na ngai, pe tozalaki na bokila.

¹⁴ Sikawa soki oyebi bokeseni yango te, ntango ozali kolanda matámbe ya mpate-ya-ngomba to mbuli, okokoka koyeba bokeseni te bobele soki ozali moí-bokila ya mayele. Mpamba te, matámbe na bango ezalaka ndenge moko; bapumbwapumbwaka ntango bakimaka. Na boye soki omoni moko ateleme na mosika pe abombi motó na yango, ee, oko—okozala na matata ya kosala bokeseni. Bazalaka na bonene ndenge moko; na ngambo ya mopanzi; ezalaka pembe, kaka lokola mbuli mpenza. Ezalaka mpenza matata mpo na koyeba bango. Kasi maséké na ye etalisaka elembo na ye, na maséké na bango. Mpate-ya-ngomba ezalaka na maseke elíngámá, kasi mbuli azalaka na maseke ebimá libanda. Pe eloko mosusu, mbuli amataka mpenza likolo bongo te, mpo na kolia.

¹⁵ Na sima, ntaba-ya-ngomba pe, na kotambola, ezali na elembo moko na ntaba-ya-ngomba, pe mpate-ya-ngomba, oyo osengeli koyeba bokeseni kati na bango, ntango ozali kuna na likolo, mpo bango mibale bafandaka likolo na ngomba. Osengeli koyeba bokeseni yango. Kasi soki botali malamú, nta—ntaba amibetelaka mabakú ntango atambolaka; kasi, mpate ya ngomba afandisaka makolo na ye *boye*, ntango atambolaka. Elembo ya lolenge oyo atiaka matámbe na ye. Bayebaka nyama na bilembo nini yango etalisaka, pe lolenge nini yango esalaka makambo, biloko nini yango eliaka, pe makambo ndenge na ndenge. Emitalisaka na elembo na yango. Na boye soki obangisi moko, bongo tala oyo ekosalema, okoki koyeba bango na ndenge bakokima. Okoki koyeba na elembo wana, ya nyama ndenge na ndenge.

¹⁶ Bongo bosilá komona yango, nayebi te soki bozalaka na bango awa to te, bandeke oyo ya lángi-mosaka; ee, babéngamaka mpenza na nkombo ya ndeke-ya-monoko-molai, pe eyánganga-ya-makelele. Eyánganga-ya-makelele ezalaka monene ndenge moko ná ndeke ya lángi-mosaka. Pe soki omoni bango mibale kopumbwa, bango mibale bazalaka lokola ndeke ya lolenge moko. Soki okokoka komona lángi te, kasi tala bobele bango, okokoka koyeba ndeke nini ezali ndeke-ya-lángi-mosaka. Eyánganga-ya-makelele epumbwaka, mwa moke, na molongo sémba. Kasi ndeke-ya-lángi-mosaka ebetaka mapapu; ntango ezali kobeta mapapu, ekitaka bongo emati, ekiti bongo emati. Bomoni, emikendelaka na kopumbwa, ndenge *wana*, nde okoki koyeba ete ezali elembo ya ndeke-ya-lángi-mosaka, na lolenge epumbwaka.

¹⁷ Soki otali ndeke oyo nká—nkánga na ntango ebimaka, lolenge emataka. Na sima tala soki ozali na etando ya mabelé-ezionami-na-mai, esika nkánga ekoki kozala, pe ná—pe ná ndeke-ya-mai. Bino baí-bokila boyebi yango. Ndeke-ya-mai Wilson ná ndeke-motámboli, bayébanaka na lolenge babimaka pe na lolenge bapumbwaka. Bayébanaka na lolenge na bango ya kopumbwa, lolenge ya ndeke nini bazali. Yango wana, soki oyoki

bango, okoki mpenza koyeba yango ezali nini, lolenge ebimeli, nini yango ezali, na elembo ya kopumbwa na ye.

¹⁸ Lokola mobali ná mwasi. Bango mibale bazali bato, kasi mwasi azalaka na bilembo ya kokesana na mobali. Nazalaki kotánga awa, eleki mwa ntango, na ntina na Salomo ná mwasi-mokonzi. Natéyá bino mwa Liteya na ngai wana awa, naino te, likolo na mwasi-mokonzi ya Sudi, ntango ayaki komonana na Salomo, pe komona likabo wana ya kososola makanisi. Nazalaki kotánga na ntina ba likambo yango, awa kala mingi te, pe balobaki, ete: “Moko na makambo ya makasi koleka, oyo ememamaki liboso na Salomo, ezalaki, mwasi-mokonzi oyo azuaki mwasi, to basi, pe alatisaki bango lokola mibali.”

¹⁹ Sikawa, yango ezalaki libanda na momesano na eleko wana, kasi, yango ezali makambo ekosalema mpenza, lelo. Pe—pe boyebi ete ezali mabe. Biblia elobi ete mwasi asengeli kosala yango te. “Ezali mbindo mpo na mwasi koláta elamba ya mobali.” Pe Nzambe oyo abongwanaka te nde alobaki yango, boye yango ezali solo.

²⁰ Na bongo, tomoni ete Salomo, bobele ntango atalaki bango malamumu, asengaki bango bátambola to básala eloko moko, pe na mbala moko alobaki: “Bazali basi.” Bomoni, akokaki koyeba, na elembo ya mwasi yango, lolenge ya etambolela na ye, ete azalaki mwasi, kasi mobali te.

²¹ Na boye penepene na eloko nyonso ezalaka ndenge wana, ná bilembo na yango. Kaka ndenge bato mingi oyo bazalaka bato ya loboko ya mwasi, pe ya loboko ya mobali. Bazalaka na ezalela moko ya lolenge bamisalelaka makambo. Okoki koyeba soki ezali moto asalaka mosala na loboko ya mobali to ya mwasi, na lolenge bamisalelaka makambo, lolenge basémbolaka ntango nyonso loboko ya mwasi to ya mobali.

Bómikanisela, Yesu azalaki na likambo ya lolenge wana, ete . . .

²² Maboko mibale ezalaka mpenza . . . Ezalaka ndenge moko. Ezalaka na bilembo ya misapi minene ndenge moko, bilembo ya misapi, misapi mitano; ya moke, index, pe bongo na bongo. Kaka ndenge loboko ya mobali ná loboko ya mwasi ezalaka na lolenge moko ya misapi, bo-momesano, bonene moko ya loboko, ndenge moko mpenza. Kasi bokeseni se moko oyo ezali, kati na yango, ezali ete moko ezali loboko-ya-mwasi, pe mosusu ezali loboko-ya-mobali. Yango nde bokeseni se moko okoki koyeba. Moko ezali loboko-ya-mwasi, mosusu ezali loboko-ya-mobali.

²³ Boye na likambo yango, Yesu alobaki . . . Nakoki koloba mwa likambo moko awa. Yesu alobaki, na Matai 24, ete: “Bilembo ya Molimo ekozala mwa pene ndenge moko, na mikolo ya suka, ekozala mpenza pene na lolenge ete ekopéngwisa baponami mpenza soko ekokaki kosalema.” Bomoni, balingaki . . .

24 Kamata loboko na yo pe tombola yango. Omoni, soki otali malamau te, moko na yango ekokani na mosusu, na lolenge nyonso, kasi moko ezali loboko-ya-mwasi pe mosusu ezali loboko-ya-mobali.

25 Nde ndenge wana milimo ezali na mikolo ya suka. Bazali mwa pene ndenge moko, kasi bazali na elembo oyo etalisaka yango polele. Moko ezali malamau, pe mosusu ezali mabe, pe ekoki kotalisama na elembo na yango.

26 Molimo ya Nzambe ekoki kotalisama na elembo na Yango. Bomoni? Molimo ya Nzambe, pe molimo ya lingomba. Molimo ya lingomba ezali, pe Molimo ya Nzambe, yango ekokani mpenza na molimo ya lingomba te, ata moke te.

Molimo ya denomination ezali.

27 Molimo ya ekólo ezali. Ekolo ezali na molimo na yango. Ntango nakendeke, na ekólo nyonso, soki okómi kuna, okokuta molimo ya ndenge mosusu. Nakendeke na Finlande, bato malamau, kasi ezalaki na molimo ya ba-Finlandais. Soki nakei na Allemagne, molimo ya ba-Allemand ezali.

28 Awa kala mingi te, nazalaki kotambola ná mwasi na ngai, ntango tozalaki naino kofanda na Indiana, eleki mibu mibale to misato, kuna na mwa super-marché. Nautaki kozonga mboka. Esengelaki tókende kosomba mwa biloko ya kolia. Pe na nzela na ngai ya kokende kuna, to... Ezalaki eleko ya mói-makasi, ntango mosusu bokondima yango te, kasi tomonaki mwasi moko alati robe. Pe ezalaki likambo ya ndenge mpenza, ngai... Ekamwisaki ngai. Na—nalobaki: “Tálá kuna, yango ezali komonana ndenge, mwasi wana alati robe.” Ba—mosusu na bango balataki bilamba oyo ezangaki... oyo elongobani te mpo na mwasi. Pe—pe ye alobaki... Nalobaki: “Ee, ezali nango bobele molimo ya ba-Américain, bomoni, molimo ya Amerika.”

29 Sikawa, molimo ya Amerika, ezali e... esengelaki ézala ekólo ya Baklisto, kasi molimo ya ekólo oyo ezali ya Baklisto te. Ekoki nango kobengama ekólo ya Baklisto, kasi ezali na bamilio na kilometele mosika na yango, na bilembo. boye, mwasi oyo, nalobaki... .

Alobaki: “Ee, biso tozali ba-Américain te?”

30 Nalobaki, nalobaki: “Te. Tofandaka awa. Oyo ezali mboka na biso. To—to—tofandaka kati na yango. Tolingaka yango. Ezali ekólo ya malamau koleka na kati ya mokili. Kasi, ata bongo, biso tozali ba-Américain te.” Nalobaki: “Tobótámá longwa na Likolo. Molimo Mosantu ekitaki, pe tozali bato ya Bokonzi moko. Ezali ya mokili oyo te.” Nalobaki: “Yango wana bandeko na biso ya basi balataka ba—robe, bazalaka na suki milai, bapakolaka-pakolaka te. Omoni, bilembo na bango etalisaka bango lokola ‘kobúlisámá mpo na Nkolo,’ longwa na Likolo.”

³¹ Yango wana, tozali koluka Bokonzi moko. Tozali koluka Mokonzi oyo akoya komema bato na Ye na Bokonzi na Ye. Pe bayebanaka na bi—bilembo na bango, ete bozui na bango ezali ya mokili oyo to ya ekólo oyo te. Ezali ya likolo, na Nkembo. Yango wana, bango, “Bazali kozela Engumba oyo Motongi pe Mosali na Yango azali Nzambe.” Batalisami na ndenge elongobani.

³² Elingaki kozala malamumu ete názála na mongongo malamumu mpo na koteya bino na mpokwa moko. Kasi na—natiki yango pembeni. Sikawa, batalisami na bilembo na yango.

³³ Tomoni ndakisa moko malamumu awa, na eleko ya Yisalaele, ntango bakotaki na mboka ya elaka. Pe Nzambe asilaki kobénga bango kokokana na elaka na Ye. Ayebisaki Abraham ete, Ye ako. . . momboto na ye ekozala na mboka mopaya oyo, mibu nkama minei, na bongo Akosikola ye na loboko monene ya nguya, na sima bakokende na mboka oyo elakamaki, esika miliki ná mafuta ya nzoi ezalaki kofuluka. Pe bongo ntango eleko ya elaka yango ebélélaki, fa—Falo moko ayaki, oyo ayebaki te lotomo monene oyo Yosefe azaláki na yango kati na bango.

³⁴ Na, boye, Nzambe atelemisaki mosakoli moko na nkombo Mose. Pe moto yango alakisamaki bwanya nyonso ya ba—Ezipito. Na ntembe te, azalaki mpenza moto monene, moto na mayele mingi mpenza, mpamba te azalaki na makoki ya kolakisa bwanya na Baezipito. Emonanaki lokola azalaki mpenza moto moko abo—abongisámáki mpo na lisikoli.

³⁵ Kasi, bomoni, oyo biso tobengaka lisiko, pe oyo Nzambe abengaka lisiko, ezali na bokeseni.

³⁶ Sika bótala moto oyo ná boyebi na ye nyonso. Ayebaki ete abotamaki mpo na kosikola bana ya Yisalaele. Atako, ná mayele na ye nyonso ya kelasi, yango nde nyonso oyo ye ayebaki, pe lokola ayebaki ete abengámáki na Nzambe mpo na kosala mosala yango, azalaki na nyonso oyo. . . Azalaki na Licence na Kotanga, Doctorat na Philosophie, Doctorat na Mibeko, pe bongo na bongo. Pe akendeki mpo na kosikola Yisalaele, kasi akweyaki mpenza na nyonso.

³⁷ Sikawa bótala, emonanaki lokola ete, ye lokola azalaki mokitani ya ngwende na Ezipito, mpo na kokóma Falo, boye akokoka kosikola bana ya Yisalaele sima na ye kokóma Falo, mpo ye moto alengelamaki na molongo mpo na—mpo na kozua kiti-na-bokonzi. Kasi, bomoni, soki ésalemaka ndenge wana, yango elingaki kotalisa elembo ya Nzambe te na kosikoláká bato na Ye.

³⁸ Alobáki Akosikola bango. Ye nde “akosikola bango na loboko ya nguya,” Mose te, ná mampinga ya nguya, kasi Nzambe ná loboko ya nguya.

³⁹ Tomoni ete mosakoli oyo akimaki pe azalaki na biliki mibu ntuku minei. Ezuaki Falo mibu ntuku minei mpo na kotondisa ye na mayele ya kelasi, pe ezuaki Nzambe mibu ntuku minei mpo na kobimisa yango kati na ye. Na bongo tomoni, ete ye, mokolo

moko, kuna sima ya ngambo ya biliki, akutanaki na Nkolo Nzambe na nzete ezali-kopela-móto, na lolenge ya Likonzi na Móto kuna na lisobe. Pe esengamaki na ye álongola sapato na ye, mpo, esika ye atelemaki ezalaki bulee. Sikawa bótala moto oyo, atángá, pe ayekólá mingi mpenza, nde oyo azaláki, bótala mbóngwáná ya bilembo na ye sima na ye kokutana na Nzambe. Asalaki mpenza koleka . . .

⁴⁰ Ntango mosusu Nzambe asalaka makambo na bopètè mpenza, pe na lolenge ya boléma mpenza, na ndenge ya makanisi ya bomoto. Bótala, moto oyo akweyaki mpenza na mobimba; ná mampinga nyonso ya Ezipito pe makambo nyonso azalaki na yango mpo na kosala mokano ya Nzambe, ná mayele na ye nyonso ya kelasi, ná mibu ntuku minei, ná makasi na ye ya bolenge. Tala ye oyo, akomi na mibu ntuku mwambe, na ntongo elandaki, ná mwasi na ye afandi likolo na mbalata-mpunda, amemi mwana na loketo, ná língenda na loboko, azali kokende na Ezipito, mpo na kokonza yango. Okoloba te oyo mpenza bolema solo! Kasi yango ezalaki kotalisa bilembo ya Nzambe, mpamba te Azalaki na moto oyo akondima Liloba na Ye. Esili. Likambo ezalaki ete, bokoki kokanisa ete moto se moko ákende kokonza Ezipito, esika oyo, mampinga ekokáki te? Kasi ezalaki nini? Elembo na ye, mayele na ye ya kosala makambo ebongwanaki. Azalaki kokende na Nkombo na Nkolo: “NAZALI OYO NAZALI.” Likambo ezalaki ete, akonzaki. Asalaki yango, mpo azalaki kokende na Nguya na Nkolo.

⁴¹ Na nzela na ye, kokambáká bana ya Yisalaele na mboka ya elaka, akutanaki na ndeko na ye, ndeko na ye ya ebongiseli, Moaba. Sikawa, ba-Moaba bazalaki bapakano ata moke te. Bazalaki bana ya mwana-mwasi ya Lota. Moko na bana na ye nde a—abótáká Moaba.

⁴² Sikawa, kuna, nalingi ete bótala malamú bikólo oyo mibale, ndenge ekeseni. Ezipito ezalaki awa, bapalángáná-palángáná, ekólo ya kokende te, bayángeli te to mokonzi te, to eloko moko te, bato minene kati na bango te, bobele bato oyo bazali na mobembo kokende na mboka ya elaka. Kasi awa, esengelaki bákatisa na mabelé ya Moaba. Yango ezalaki mpenza na nzela ya elaka.

⁴³ Ba-Moaba, pe, bazalaki kondimela Yawe, pe bazalaki na mosakoli. Yisalaele pe azalaki na mosakoli. Bango mibale bazalaki na basakoli.

⁴⁴ Sikawa bótala, bakomaki na esika oyo mosakoli ya ekólo ekóma ebongiseli azalaki koya mpo na kolakela mabe ekólo oyo mosusu, mpo azalaki bobele kotelengana, mpo azangaki mpenza esika ya kofanda. Na bongo, bakómaki wana.

Botala basakoli mibale wana: Soki totali na ndenge ya na mobóko, bango mibale bazalaki kati na solo. Mpamba te, bótala,

Balaame, episkopo, alobaki na bango: “Sikawa bótongela ngai bitumbelo nsambo.”

⁴⁵ Nsambo ezali motango ekoki-be ya Nzambe, ezali kotalisa Bileko Nsambo ya Lingomba, mikolo nsambo ya kokelama, pe bongo na bongo. Sikawa bótala, nsambo, Nzambe akoki-be na nsambo.

⁴⁶ “Bitumbelo nsambo, pe likolo na etumbelo moko na moko, bótia ngo-ngombe-mobali.” Sikawa yango ezalaki mpenza etumbelo ya ndenge moko bazalaki na yango na moláko ya Yisalaele. Kuna na ngámbo ya Yisalaele, bazalaki na etumbelo ndenge moko na oyo bango bazalaki na yango awa; pe mbeka ndenge moko, ngombe-mobali pe ngombe-mobali; mosakoli pe mosakoli. Bikólo mibale, ekesáná.

⁴⁷ Ndakisa ebongi-be mpenza ya ntango tozali kobika na yango, soki tózalaka na ntango ya kolobela yango. Bótala, Nzambe kosala likambo oyo na lisepe, mpo tokoka kosósola, ndenge ekokani.

⁴⁸ Sikawa, lisusu, Balaame asengaki mémé-mobali likolo ya etumbelo moko na moko. Ezalaki kotalisa kondima na ye na Masiya oyo akoya. Mémé-mobali, mpate-mobali, yango ezalaki mbeka ya ndenge moko oyo bazalaki na yango kuna na Yisalaele; kuna, na moláko ya Yisalaele, awa na . . . na ngambo ya Moaba. Mpo . . . na mobóko, bango nyonso mibale bazalaki na solo, kasi, bótala, mpo na mobóko ya malakisi.

⁴⁹ Kasi mosakoli moko kuna na moláko ya Yisalaele azalaki na bilembo ya Nzambe pe na Liloba na Nzambe. Pe akangamaki na elaka ya Nzambe mpo na eleko wana, mpo azalaki na nzela ya kokende na mboka ya elaka. Bomoni?

⁵⁰ Sikawa, na oyo etali mobóko, Balaame, Balaake akokaki kozala lokola Mose.

⁵¹ Kasi, bomoni, Mose, lokola azalaki mosakoli ya solo ya Nzambe, azalaki bobele na oyo etali mobóko te, kasi azalaki na kotalisama ya Nzambe. Bomoni, azalaki na nzela ya mosala na ye, oyo elakamáki mpenza mpo na eleko wana; mpo na eleko ya Nowa te, kasi mpo na eleko oyo wana. “Nakomema bino na mboka oyo ezali kofuluka na miliki ná mafuta ya nzoi.” Bazalaki na mobembo, pe Yisalaele atalisamaki ná mosakoli na bango, Mose, ná Nsango ya eleko wana. Bilembo ya Nzambe etalisamaki kati na Mose. Likonzi na Móto ezalaki kolanda ye. Azalaki pe na bolimbisi ya masumu kosala mosala; ezalaki ya maloba te, kasi ezalaki kosala mosala. Ezali te oyo ekoya sima; oyo ezali sika-sikawa!

⁵² Bótala, azalaki na nyoka ya motáko, oyo etombwámáki mpo na bokono pe ba-mpasi ya bato, yango wana Mose azalaki kosalela kobikisama ya bo-Nzambe. Azalaki na bolimbisi ya masumu, nyoka ya motáko oyo ezalaki elembo kotalisa ete

Nzambe azalaki kati na moláko, pe bato bazalaki kotala nyoka ya motáko yango pe bazalaki kobika.

⁵³ Azalaki pe na Libanga ebetami oyo ezalaki kolanda ye. Pe yango ezalaki kotalisa Nzambe, mpo na kobatela Máí ya Bomoi kati na bango, esengo pe lobiko, ete bakokufa te kasi bazaláki na Bomoi ya seko. Ezalaki elilingi ya . . . Libanga oyo ebetami na biliki ezalaki elilingi ya Klisto oyo abetami.

⁵⁴ Na bongo, bazalaki kosala mobembo yengebene na elaka. Yango ezalaki kotalisama mosusu, ya kolakisa elembo ya Nzambe. Ata soko oyo mosusu wana azalaki na moboko ná Liloba ndenge nini; ye azalaki na moboko, bakísá kotalisama, ná elembo ya Nzambe kati na bango. Nzambe Azalaki komitalisa. Basakoli mibale, bango nyonso mibale bazalaki basakoli, pe bango nyonso mibale bazalaki bato na mobóko; kasi Nzambe atalisaki bilembo na Ye kati na Mose, mpo ye azalaki na bilembo ya Nzambe elongo ná ye.

⁵⁵ Sikawa, lisusu, bilembo ya Nzambe ezalaka ntango nyonso bikamwa, mpo Ye azali bikamwa. Nzambe azali bikamwa. Ezalaka ntango nyonso libanda na momesano mpo na lolenge ya makanisi ya ntango yango. Boyebi yango. Nzambe abulunganisaka ntango nyonso makambo, mpo na—mpo na bitónge ya basambeli, na bileko nyonso oyo esilá koleka.

⁵⁶ Pe ata mbala moko te moto moko to etónge ya bato oyo batikálá komikómisa ebongiseli na nsango moko, bongo bázanga kokufa pe kobwakama na fúlu, pe batikálá kotelema lisusu ata moke te. Lisolo yango ezali te. Ba-Lutherien, ba-Presbiterien, ba-Methodiste, ba-Batiste, ba-Pantekotiste, pe bongo na bongo, batikálá kotelema lisusu ata moke te, na ntango bakómisi Yango likambo ya etónge.

Nzambe asalaka na moto moko na moko.

⁵⁷ Bótala, Azalaka mpenza libanda-na-momesano na lolenge ya makanisi. Bomoni, tokolanda lolenge moko boye, pe esengi tóndima Yango *boye*. Na sima Nzambe akoya ná Liloba na Ye oyo Asilá kolaka, pe Akomitalisa kati na Liloba yango. Etónge oyo ekokoka kolanda Yango te, mpo endimaka Yango te. Bomoni, esilá komikata pe komilongola na Yango.

⁵⁸ Ndakisa Yosefe, azalaki mwana ya Dawidi, pe moto moko malamumu, Yosefe mobali ya Maria. Azalaki moto moko malamumu, pe, na ntembe te, azaláki ntango nyonso kotánga Biblia, Makomi, mpo . . . pe azaláki kozela Masiya oyo akoya, pe esengelaki áyeba likambo nini Makomi elobáki ete ekosalema. Yisaya alobáki: “Mongondo akokumba zemi.”

⁵⁹ Ee, sikawa, azalaki kobandama na elenge mwasi oyo, Maria, oyo azalaki ntango mosusu na mibu zomi na mwambe, pe ye moko azalaki ntango mosusu mwa mokolo. Na sima, ntango bakómaki babandami mpo na kobalana, mwasi amonani ete azali na zemi. Sikawa, ezalaki mpenza mwa mpasi mpo na

Yosefe kozua mokano mpo na likambo yango. Na ntembe te Maria ayebisaki ye bokutani na ye na Gabriele. Kasi tomoni ete, lolenge ezalela na ye ezalaki kokamba ye, atiaki ntembe na likambo yango.

⁶⁰ Sikawa emonanaki été akumbaki zemi liboso bábálana. Pe, na Biblia, etúmbu na yango ezali liwa, kobomama na mabanga. Mwasi abálá te, soki akumbi zemi, esengelaki ábomama na mabanga. Na Yisalaele, bondumba ezalaki te. Balongolaki yango. Na bongo, tomoni ete, Dutelonome elobeli biso yango.

⁶¹ Sikawa tomoni ete, emonanaki lokola Maria azalaki koluka kozua Yosefe lokola nguba na ye na likambo ye asilaki kosala. Mpamba te, soki bakangaki ye ná zemi liboso bábálana, boye esengelaki abomama na mabanga, na yango esengelaki sikawa ázala na moto moko oyo akokaki kobomba ye. Pe, na nyonso wana, emonanaki lokola yango nde azalaki koluka kosala.

⁶² Kasi Yosefe, ntango atalaki na miso na ye kitoko ya minene, pe ye alobaki: “Yosefe, Gabaliele alobaki na ngai: ‘Molimo Mosantu akozipa yo, pe Eloko oyo okozua zemi na yango kati na yo—kati na yo euti na Molimo Mosantu. Ezali Nzambe. Nde oyo Akobengama, “Mwana na Nzambe.”’” Pe, Yosefe, a—a—alingaki kondima yango, kasi ezalaki mpenza libanda-na-momesano. Esalemáká naino te liboso.

⁶³ Pe ezali mpenza ndenge wana lelo. Soki tokokaki bobele. . . Soki nazalaki na lolenge moko ya komema bato komona ete libanda-na-momesano ya likambo songolo, soki etalisami na Liloba, na bongo bilembo na yango ékotalisa polele oyo yango ezali. Ezali Nzambe kati na mosala.

⁶⁴ Yosefe esengelaki na ye koyeba likambo oyo. Esengelaki na ye koyeba ete: “Mongondo akokumba zemi.” Kasi azalaki sembo na ntina na yango. Alingaki koboya ye te, na nkukú, kasi a—azalaki na makanisi ya kosala yango.

⁶⁵ Na bongo Mwanje na Nkolo amonanaki na ye na ndoto. Bosílá komituna mpo na nini Amonanaki na ye na ndoto? Na mikolo wana, mosakoli azalaki te. Ndoto na bango ezalaki makasi mpenza te, esengaki na yango ndimbola moko te. Alobaki: “Yosefe, yo mwana na Dawidi, kobanga te kozua Maria mwasi na yo, mpo zemi oyo amemi euti na Molimo Mosantu.” Bomoni, boye, yango ekataki likambo. Bomoni, Ayaki epai na ye na ndoto, na nzela ya mibale. Kasi, bomoni, ezalaki na mosakoli moko te kuna mpo na kotalisa Liloba yango, ete: “Oyo nde mongondo oyo akokumba zemi.” Bomoni? Boye, yango wana, Amonanaki na ye na ndoto, mpo azalaki sembo, moyengebene pe moto malamau.

⁶⁶ Pe nandimi ete Nzambe akoya epai na moto malamau nyonso, na lolenge moko, mpo na kotalisa misala na Ye na moto malamau yango, mpo na eleko yango, soki moto yango abéngámi na Nzambe mpo na eleko wana.

⁶⁷ Boye, kasi yango ezalaki mpenza libanda-na-momesano, bakokaki mpenza kososola yango malamumu te. Kasi, makambo oyo nyonso ná lolenge ya libanda-na-momesano emonanaka, ntango nyonso, kokokana ná Liloba elákámá mpo na eleko yango.

Sikawa ezali na bato mosusu bakoki kokende bipai na bipai, pe koloba: “Ee, likambo *oyo* ezali libanda-na-momesano, ezali Nzambe. *Oyo* ezali libanda-na-momesano.”

⁶⁸ Kasi, bomoni, esengeli étalisama na Liloba, pe Liloba ezali Nzambe. Bomoni? Na bongo elembo ya kotalisama oyo ekotalisa nani yango ezali, mpamba te Nzambe alobaki: “Likambo *oyo* ekosalema,” pe esalemi. Bomoni? Elembo na yango ezali Liloba na Nzambe oyo ezali kotalisama na elembo ya likambo oyo ezali kosalema.

⁶⁹ Alobaki ete, na mikolo ya suka, Akosopa Molimo Mosantu. Asali yango. Bilembo na yango etalisi ete ezali Nzambe, Liloba na Ye elákámá. Bomoni, emitalisaka ntango nyonso yango moko.

⁷⁰ Sikawa, ntango nyonso, mbala nyonso, esembolaka liloba, ntango Liloba elobami sembo te. Bosílá komona yango? Esalemaki na mikolo ya Nowa, oyo asembolaki eleko wana ya zebi, ete Nzambe akosopa mái na mokili, longwa na likolo. Ezalaki Mose, bomoni, oyo asembolaki, ntango bango nyonso bazalaki kofanda na Ezipito, pe bongo na bongo, kasi Liloba na Nzambe esengelaki éya mpo na kotalisama. Pe Solo ya Liloba esembolaka libunga.

⁷¹ Bótika nátuna bino likambo moko. Tokoki kokota na mwa bozindo awa. Nakani koteya malakisi to mateya te, kasi bótika nátuna bino bobele likambo moko.

⁷² Yesu azalaki Liloba. Toyebi yango. Biblia nde elobi yango. Santu Yoane, mokapo ya 1: “Na ebandeli Liloba ezalaki, pe Liloba ezalaki elongo na Nzambe, pe Liloba ezalaki Nzambe. Pe Liloba ekómaki nzoto pe efandaki elongo na biso.” Azali kaka Liloba. Na boye ntango oyo Ye akokaki koyeba makanisi na bango, esengelaki bayeba ete wana ezalaki Liloba, mpamba te Liloba na Nzambe elobaki été yango nde Ye akosala. Azalaki Mosakoli yango.

⁷³ Sikawa bótala, tomoni ete ntango Abotamaki, penepene na mbula zomi na mibale, Akendeki na fėti ya mongombo. Pe bakendeki kuna na elámbo na Elekeli. Pe, wana bazalaki kozonga, basilaki kosala mikolo misato ya mobembo pe bazángaki Ye; kobanza, kutu, kokanisáká, komilobela ete Azalaki kuna elongo na bato ya libota na bango.

⁷⁴ Tokoki kobimisa liteya moko longwa na yango. Ezali pe kosalema mingi mpenza lelo! Sikawa bino ba-Methodiste, ba-Batiste, ba-Presbiterien, ba-Luterien, ba-Katoliko, bózala banani, bomoni, bozali kosala likambo moko wana. Bozali kobanza lokola Wesley azalaki na kolamuka ya monene, Luther azalaki

na kolamuka ya monene, to ba-Pantekote bazalaki na kolamuka ya monene, bozali kobánza ete Azali elongo na bato, na ntango oyo, mbala mosusu Azali kuna te.

⁷⁵ Bakendeki koluka Ye. Bamonaki Ye wapi? Esika batikaki Ye, na Yelusaleme. Pe ntango bamonaki Ye, Azalaki kosala nini? Mwana moke, ya mbula zomi na mibale, ntango mosusu Atikálá kokota kelasí moko te, bobele oyo mama na Ye alakisáká Ye; pe tala Ye oyo na tempelo, kolobanáká maloba ná banganganzambe wana, na oyo etali Liloba na Nzambe. Pe bazalaki kokamwa bwanya ya Mwana yango. Mpo na nini? Azalaki Liloba. Sikawa bótala.

⁷⁶ Pe sikawa, nazali koyokisa bino soni te, bino ba-Katoliko, baoyo bobéngaka Maria mama ya Nzambe, kasi bótika nálakisa bino mwa libunga moko awa. Soki lingomba etongami likolo na Maria, bótala likambo nini esalemaki. Sikawa abélémaki pe alobaki: “Oh, ngai ná tata na Yo tolukaki Yo, mai na miso.” Bótala maloba yango, na ntango wana, akweisaki litatoli na ye moko. Alobaki: “Ngai ná tata na Yo tolukaki Yo, mai na miso.”

⁷⁷ Bótala Liloba yango. Azalaki Liloba. Alobaki: “Boyebi te ete Nasengeli kosala mosala ya Tata na Ngai?” Bótala Liloba kosembola libunga. Bobele wana, liboso na ba-nganganzambe yango, abebisaki litatoli na ye. Alobaki ete akumbaki zemi na nzela na Molimo Mosantu, pe awa alobi ete Yosefe azali “tata” na Ye. Bomoni ndenge Liloba yango ekangi yango nokinoki? Azalaki Liloba. Sikawa, boyebi ete mwana moke ya mbula zomi na mibale akokaki kosala yango te. Azalaki Liloba. Azalaki Liloba Lilobami ya eleko wana, boye yango wana elembo etalisami ya Nzambe ezalaki kati na Klisto. Asembolaki mabunga. Alobaki. . .

Balobaki: “Ee, biso tozali bayekoli ya Mose.” Bomoni?

⁷⁸ Alobaki: “Soki bozalaki bayekoli ya Mose, bolingaki koyeba Ngai. Akomaki na ntina na Ngai. Mose alobaki: ‘Yawe Nzambe na bino akotelemisa Mosakoli moko lokola ngai.’ Bolingaki koyeba Ngai, soki boyebaki Mose.”

⁷⁹ Pe, bomoni, Liloba esembolaka ntango nyonso libunga ya eleko. Kasi bato balingaka kondima yango te. Batingamaka kaka na yango, motindo moko.

⁸⁰ Kasi Yesu asembolaki mama na Ye moko. Pe mama na Ye azalaki na libunga, mpo asíláká koloba ete zemi ya Mwana oyo ezalaki kati na ye ezalaki na nzela ya Molimo Mosantu, kasi awa abongoli litatoli na ye pe alobi ete Yosefe azalaki “tata” na ye, azalaki tata na—na Yesu. Sikawa soki—soki Yosefe. . .

⁸¹ Soki Azalaki mwana ya Yosefe, soki Azalaki kosala mosala ya tata na Ye, Alingaki kozala kuna na esika ya mosala ya mabaya.

⁸² Kasi Azalaki kosala mosala ya Tata na Ye, kuna na Tempelo, kopameláká bibongiseli wana. Bomoni? Azalaki kosala mosala ya Tata na Ye, Mwana moke ya mbula zomi na mibale. “Boyebi te ete Nasengeli kosala mosala ya Tata na Ngai?”

⁸³ Bomonaki ntango Yesu amekamaki na Satana? Elembo na Ye kuna, ntango Azalaki kati na komekama na Ye, etalisaki ete Azalaki Nzambe, mpo Akangamaki na Liloba. Bomoni? “Ekomámi,” elabaki Satana.

Yesu alobaki: “Ekomámi pe,” Akangamaki mpenza na Liloba.

⁸⁴ “Nzambe, na ntango ya kala,” totángi awa. “Nzambe, na ntango ya kala,” wana ezali bileko esila koleka, “Na lolenge mingi,” ba-nzela mingi, “Amitalisaki na basakoli na Ye na nzela na bimononeli.” Wana nde ezalaki elembo ya mosakoli, ezalaki ntango asakolaki makambo liboso pe yango esalemaki. Sikawa wana ezalaki elembo na ye, ya kotalisama na ye, ete Nzambe azalaki elongo na ye. Boye yango epesaki ye makoki ya kolimbola Liloba ya eleko wana, mpo: “Liloba na Nzambe eyaka epai na basakoli,” elembo ya mosakoli, oyo Ye asílá kolobela.

⁸⁵ Biblia elobi: “Soki moko azali, pe makambo ye alobi ekokisami, boye bóyoka ye; kasi, soki ekokisami te, bóndimela ye te, bóbanga ye te, kasi na Ngai. . . soki—soki Liloba na Ngai ezali kati na ye te. Kasi soki ekokisami mpenza, boye Liloba na Ngai ezali kati na ye.” Yango nde kotalisama na ye. Yango nde elembo ya mosakoli.

⁸⁶ Sikawa, Nzambe, na ntango ya kala, nde ndenge wana nde Atalisaki bilembo ya kotalisama na Ye Moko epai na moto, na kolobáká na nzela na moto oyo abengamaki mpo na kozala mosakoli. Sikawa, Biblia elobi yango: “Nzambe, na ntango ya kala, na ndenge mingi, alobelaki ba-tata na nzela na basakoli.”

⁸⁷ Totángi pe, kuna na Petelo ya Mibale, ete Liloba na Nzambe mobimba ekomamáki na bango. “Bato ya kala, bapusamaki na Molimo Mosantu, bakomáki Biblia.” Bazalaki basakoli. Liloba eyaka epai na bango pe bakomáki Yango, bakomáki yango, na nse na mpémélá. Liboso, bayebanaki lokola basakoli, na sima ba—bakomáki Liloba ya mpémélá, pe bazalaki na ndimbola ya emoniseli ya Nzambe mpamba te ezalaki nde Nzambe kati na moto.

⁸⁸ Sikawa, lolenge wana nde Azalaki Komitalisa, na bilembo na Ye ya komitalisa, bimononeli na bango ezalaki kokokisama, ezalaki elembo ya Nzambe kati na bango, komimonisáká Ye moko na bato.

⁸⁹ Sikawa, ezalaki na lolenge se moko wana nde Azalaki kati na Klisto. Mosakoli azalaki kaka eteni moko ya moke. Klisto azalaki litondi ya Nzambe. Pe Nzambe azalaki kati na Klisto, kozongisa mokili na boyokani ná Ye moko. Pe bilembo na Ye etalisaki Ye polele, oyo Ye azalaki, na lolenge ete Alobaki: “Soki

Nasali misala ya Tata na Ngai te, na boye bándima yango te. Soki Nazali na ezaleli ya Tata na Ngai te, na boye bándima Ngai te, bándima makambo Nazali koloba te. Soki Nazali na ezaleli ya Tata na Ngai kati na Ngai te, na boye bándima yango, ata moke te.”

⁹⁰ Sikawa, bilembo na Ye ebongwanaka te. Nzambe akoki kobongola ezaleli na Ye te, ndenge moko—ndenge moko pe mwa—mwana mpate ekoki kobongola ezaleli na yango te, to eloko mosusu nyonso ekoki kobongola bilembo na yango te. Mpamba te, ntango nyonso oyo ezali na lolenge na yango ya ebandeli, ezali ya ebandeli. Pe soki obongoli eloko moko, na boye obongoli yango longwa na lolenge na yango ya ebandeli.

⁹¹ Ezali kaka lokola okoki kozua ngu—ngulu, okoki kosukola ngulu pe—pe kopakola yango ína na manzáka ya makolo, ndenge basi basalaka, kopakola yango rouge-à-lèèvres, pe kolatisa yango robe ya kitoko. Bimísa ngulúbe yango libanda, ekokende mbala moko na potopóto, mpo na komipota na potopóto lisusu. Mpo na nini? Azali ngulu, nde nyonso wana. Kasi, pe, kasi, boyebi, bino bokoki te kosala . . .

⁹² Mwana-mpate akosala yango te. Akokota ata na potopóto wana te. Alingi kozala ata na eloko moko te ya kosala ná yango. Ezali bilembo na yango. Bomoni? Okoki kolatisa ye bilamba ya ndenge moko, kasi na bosólo, akokende kutu te. Libanda ezali na ntina te; ezali likambo ya kati mpenza. Sikawa, lokola Nzambe azali liziba ya bomoi nyonso . . .

⁹³ Bózanga kososola likambo oyo te. Nazali komeka, na nyonso ezali kati na ngai, komema bino kososola likambo moko. Bomoni? Ezali mpo na bolamu na bino, baninga. Ezali mpo na—na bino. Bomoni?

⁹⁴ Nayeri awa te mpo bómona ngai. Nayeri awa te, mpo esika mosusu ya kokende ezalaki te. Nayeri awa mpo namiyokaki ete náya awa. Namiyokaki ete mosálá oyo Nkolo apésá ngai esengeli emonisama kati na bato awa, pe nazali komeka komema bino komóna oyo Nzambe azali mpenza sikawa. Azali Liloba lilakami na Ye. Azalaka ntango nyonso Liloba, pe Amitalisaka na nzela na elembo oyo Alakaki. Moto ya lolenge moko boye akoya na eleko moko boye, yango ezali kati na Liloba, boye elembo ya moto yango oyo asengelaki koya, ekotalisa ete ye nde moto yango.

⁹⁵ Yango nde ntina oyo asengelaki Yesu ázala Oyo Ye azalaki. Basengelaki komona yango. Ezali kokamwa te ete bazalaki ya kokufa miso. Likambo yango. . . Alobaki, atako Asalaki bikamwa mingi mpenza, kasi bakokaki kondima te, mpamba te Yisaya alobaki: “Bazali na miso kasi bazali komona te, pe bazali na matoi kasi bazali koyoka te.” Bomoni? Eleko moko na moko, bobele na eleko na Ye te; kasi na bileko nyonso, ndenge: “Nzambe, na ntango ya kala, na lolenge mingi,” ata bongo bakokaki kososola yango te.

96 Sikawa, bilembo na Ye ekweyaka ata moke te. Ezalaka ntango nyonso ndenge moko. Sikawa, bómikanisela, elembo na Ye, elembo ya Nzambe, ekoki kokweya te. Soki ekweyi, boye Nzambe asili kokweya. Pe Biblia elobi, na Baebele 13:8, ete: “Yesu Klisto azali motindo moko lobi, lelo pe libela.” Yango wana, Azali Nzambe oyo abongwanaka te. Ezaleli nyonso oyo Azalaki na ebandeli, Azali bobele ezaleli moko wana. Lolenge nyonso oyo Asalaki, ntango nyonso oyo Asalaki likambo moko, Akosala yango lolenge moko, mbala nyonso. Soki Asali bongo te, ezaleli na Ye nde ebongwani, bomoni, pe bilembo na Ye ekotalisa eloko oyo ezalaki ya Nzambe te. Bomoni? Na bongo, tokoyeba te esika nini. . .

97 Ndenge Polo alobaki: “Soki kelelo epesi lolaka polele te, nani akomilengela mpo na etumba, soki kelelo epesi lolaka polele te?” Sikawa, soki kelelo esengeli koyula ete “bózonga,” yango nde tosengeli kosala, kozonga. Soki kelelo eyuli “bóbunda,” yango nde tosengeli kosala, kobunda. Kasi Kelelo ezali nini? Ezali Liloba na Nzambe. Etalisaka Nzambe polele, soki ezali—soki ezali “bómatá, bófanda, bózonga, bósangisa mandóki,” ézala likambo nini. Ezali koyúla ya Kelelo ya Nzambe.

98 Pe lolaka elongobani te, ntango Biblia elobi ete likambo moko boye esengeli kosalema; moto moko akoloba: “Oh, oyo wana ezalaki mpo na mokolo mosusu, oyo wana.” Na bongo, oyo wana nde lolaka elongobani te. Na bongo bokoyeba likambo ya kosala te.

99 Yesu alobaki: “Nazali na nguya ya kopesa bomoi na Ngai pe kosekwise yango.” Oyo wana ezali lolaka elongobani.

100 Mwasi yango alobaki: “Toyebi ete Masiya akoya; pe ntango Akoya, Akoyebisa biso makambo ndenge Asalaki.”

101 Alobaki: “Ngai nazali Ye.” Oyo wana ezali lolaka elongobani “Ngai nazali Ye.” Ah-ha! Amen.

Balobaki: “Batata na biso baliaki mána na biliki.”

102 Alobaki: “Bango nyonso bakúfáki, moko moko.” Alobaki: “Kasi Ngai nazali Lipa ya Bomoi oyo euti na Nzambe, longwa na Likolo.” Lolaka wana elongobani. “Nazali Nzete ya Bomoi, longwa na Elanga ya Edene.” Te, lolaka wana elongobani mpenza. Na tembe te. Eyulaki mpenza polele. Azalaki mpenza na solo na makambo nyonso Asalaki.

103 Biblia eyúlaka lolaka ya kobúlúnganisa te. Etalisaka polele elembo ya Nzambe na koyúla na yango.

104 Yesu alobaki, na Santu Yoane 10:37: “Soki Nazali kosala misala ya Tata na Ngai te, oyo . . . pe soki Nazali na ezaleli ya Tata na Ngai te, na boye bóndima Ngai te. Ezali yango nde, yango nde etalisaka polele ezaleli na Ye kati na Ngai, bilembo na Ye.”

105 Mpamba te, Tata azali Liloba: “Na ebandeli Liloba ezalaki, pe Liloba ezalaki elongo na Nzambe, pe Liloba ezalaki Nzambe,”

pe elembo ya Nzambe etalisamaka na elaka na Ye mpo na eleko wana.

¹⁰⁶ Sikawa, soki Abikáki na ntango ya Mose, elingaki kosimba te. Pe soki Mose abikáki na ntango na Ye, elingaki kosimba te. Soki Abikáki na ntango ya Nowa, elingaki kosimba te, to soki Nowa abikáki na ntango na Ye. Nowa azalaki kosakola makambo mpo na eleko wana, pe elembo na ye ná makambo asalaki etalisaki ye polele kati na Liloba na Nzambe. Mose asalaki likambo moko yango.

¹⁰⁷ Pe awa Yesu ayaki, pe Liloba oyo elakamaki mpo na eleko wana etalisamaki polele kati na Yesu Klisto na nzela na elembo ya Liloba, oyo ezali Nzambe. Amen.

¹⁰⁸ Kosopana ya Molimo Mosantu, na mikolo ya suka, likolo na bato mpamba, esili kotalisa polele elembo ya Nzambe elongo na bato. Alakaki yango. Ezali Liloba. Alobaki ete Akosala yango. Moto moko te akoki kolongola yango. Ye alobaki ete Akosala yango.

¹⁰⁹ Boye makambo nyonso oyo Alakaki, yango nde Azali kosala. Ezali kotalisa polele elembo na Ye. Iyo, misie. “Bóndima yango te, bóndima maloba na Ngai te, soki elembo na Ngai ezali ya Nzambe te.”

¹¹⁰ Sikawa bótala, na Yoane 14:12: “Ye oyo akondimela Ngai,” Alobaki, “azali na etaliseli na Ngai, elembo na Ngai. Ye oyo akondimela Ngai, misala mizali Ngai kosala, ye pe akosala yango.” Yango ezali kotalisa ete ezaleli ya Klisto ezali kati na ye, kolakisáká bilembo na Ye. Amen.

¹¹¹ Namiyoki mpenza mosambeli na ngonga oyo, ata soki mongongo ekauki boye. Iyo, misie. Oh, la la! Bomoni, Yango ezali ata na libunga moko te! Bomoi na Ye! “Ye oyo akondimela Ngai, misala mizali Ngai kosala, ye pe akosala yango.” Bomoni, yango etalisi elembo polele.

¹¹² Alobaki likambo ndenge moko: “Soki ezaleli na Ngai etalisi Ngai moko polele te,” Nzambe kati na—kati na Ye, na boye Ye. . . bóndima Ye te. Sikawa, Alobaki lisusu ete Akotalisama polele kati na yango. boye, yango, soki etalisi Ye polele te, boye, Azali te oyo Azali koloba.

¹¹³ Pe, lelo, soki Klisto Amitalisi polele te, elembo ya Klisto etalisi biso polele ete tozali ya Klisto, ete tondimaka Liloba. . . Yesu azalaki Liloba, boye esengelaki Ándima Liloba. Pe ndenge nini tokoki koloba ete tozali ya Klisto, bongo tozali koangana Maloba ya Biblia yango? Molimo Mosantu ya Klisto ezali Nzambe kati na yo, pe Ekoloba “Amen” na elaka nyonso. Biblia elobi: “Bilembo oyo ekobila baoyo bakondima.” Molimo ya Nzambe elobi: “Amen.” Bomoni?

¹¹⁴ Moko na bango te akoloba: “Te, oyo wana ezalaki mpo na eleko mosusu; oyo wana ezalaki bobele mpo na bayekoli.”

115 “Bókende na mokili mobimba pe bóteya Nsango-malamu na bikelamu nyonso. Ye oyo akondima, ata esika nini na mokili mobimba, bilembo oyo ekobila ye, ndenge moko.” “Motindo moko lobi, lelo pe libela,” elembo ezali kotalisama polele.

116 Yango nde ezali kosala Baebele 1:1: “Nzambe ya ntango ya kala, alobaki na ba-tata na nzela ya basakoli,” kotalisa Klisto, asekwisami lelo, na elembo se moko oyo Asáláki na ntango ya kala. Bosili komona yango? Nzambe abongolaka lolenge na Ye te.

117 Na Biblia ya kala, ntango molóti alótaki ndoto, pe mosakoli azalaki na mboka te mpo na komona soki ndoto yango ezali solo to te, bazalaki na lolenge mosusu ya koyeba yango. Bazalaki kozua moto yango, oyo nyonso alotaki ndoto yango, bazalaki komema ye na tempelo. Libenga-ya-ntólo ya Alona, oyo azalaki nganganzambe mokonzi, etiamaki na likonzi. Pe molóti yango azalaki koloba ndoto na ye. Ata yango eyokani malamau ndenge nini, ata eyokani solo ndenge nini; soki Pole ya bikamwa engengisamaki te likolo na mabanga yango, oyo ebéngamaka Urimu Tumim, (batángi Biblia bazali kososola); na ntango wana, ata eyokanaki solo ndenge nini, ezalaki yango te. Lolenge ya libanda-na-momesano ya Nzambe, ezaleli ya Nzambe, esengelaki kolakisa bilembo na Ye na lolenge ya bikamwa, mpo na kotalisa ete Amitalisi Ye moko polele na nsango oyo. Amen.

118 Nazali koloba likambo yango moko na mpokwa oyo. Urim Tumim ya kala esilá na yango, kasi Liloba ezali bobele eloko oyo etalisaka polele elembo ya Nzambe, elaka ya ngonga oyo tozali kobika na yango. Oyo wana nde bilembo ya Nzambe oyo ezali kotalisama polele na nzela na elaka ya ngonga oyo tozali kobika na yango.

119 Yango ezali kokomisa Nzambe motindo moko ndenge Azaláká. “Na ntango ya kala,” bótala, “na lolenge mingi, Alobáki na ba-tata na nzela ya basakoli.” “Pe mibeko ná basakoli ezalaki kino Yoane; kobanda ntango wana, Bokonzi ya Likolo.” Bótala: “Kasi na mokolo oyo ya suka,” kolobeláká likambo moko yango oyo Asáláki kala, “na nzela na Mwana na Ye Klisto Yesu.” “Nzambe, na ntango ya kala, na lolenge mingi, alobáki na ba-tata na nzela ya basakoli; na mokolo oyo ya suka,” azali kosala motindo moko, “kosolola na bato (ba-tata) na nzela ya Mwana na Ye Klisto Yesu.” Asekwisaki Ye longwa na bakufi, pe Azali kobika kati na biso, Komitalisáká polele pe koyebisáká biso makambo liboso ésalema, ete Asosolaka makanisi pe bamposa ya motema. Yesu Klisto motindo moko lobi, lelo pe libela! “Nzambe, na ntango ya kala pe na lolenge mingi asololáki na ba-tata na nzela ya basakoli, kasi na mikolo oyo ya suka, na nzela ya Yesu Klisto Mwana na Ye.” Makomi ekoki kobebisama te. Ezali mpenza bongo.

¹²⁰ Ndenge nalobaki liboso, Nzambe azali na ntina ya moto moko te mpo na kolimbola Liloba oyo. Alimbolaka Ye moko Liloba na Ye. Ntango Alobi likambo, ekokisami, yango nde ndimbola. Bomoni? Azali na ntina ya moto moko te mpo na koloba: “Ee, nabanzi ete elingi koloba *boye*.” Nzambe atalisaka yango polele na ndimbola na Ye Moko.

¹²¹ Ézali, soki elaka ezali mpo na eleko wana, tokoki kobika na pole ya—ya—ya Luther te, tokoki kobika na pole ya Wesley te, tokoki kobika na pole ya baoyo wana te. Tosengeli kobika na Pole oyo elakamaki mpo na lelo oyo.

¹²² Bongo soki Mose akendeki na Ezipito, pe alobáki: “Ee, tokotonga masuwa moko ya monene. Tokonana ebale mpo na kobima na ekólo oyo. Ébale ya Nile ekomata?” Balingaki kotala na rulo oyo elingamaka; elaka moko te na ntina na wana. Ezali solo. Kasi, bomoni, amitalisaki lokola mosakoli ya Nzambe, mpamba te makambo alobaki ekokisamaki, na boye nde bayebaki ete azalaki na Liloba na Nkolo. Fáló azalaki na makongá, kasi Mose azalaki na Liloba. Na bongo ntango bakómaki na mai-na-mbu, makongá nyonso ezindaki na nse na mai-na-mbu, kasi Mose amemaki Yisalaele na ngámbo mosusu ya mai-na-mbu, na libongo, mpo azalaki na Liloba, pe azalaki Liloba ya eleko wana. Mose azalaki Liloba emonisami polele mpo na eleko wana.

Eliya azalaki Liloba emonisami polele mpo na eleko wana.

¹²³ Klisto azali Liloba emonisami polele, pe bilaka oyo Apesaki. “Sima na ntango moke, mokili ekomona Ngai lisusu te; kasi bino bokomona Ngai, mpo Nakozala elongo na bino, ata kati na bino, kino na suka ya mokili. Misala mizali Ngai kosala, bino pe bokosala yango.” Alakaki makambo oyo. Ezali nini? Ezali elembo ya Nzambe kotalisa polele Liloba na Ye, ndenge Asalaki na bileko nyonso.

¹²⁴ Malaki 4, Alobaki: “Liboso na mokolo monene pe na nsomo ya Yawe koya, tala, Nakotindela bino Eliya, mosakoli; ye akozongisa kondima ya bana na ba-tata na bango, liboso mokolo yango éya.” Alakaki yango.

¹²⁵ Yesu alobaki, na mokapo ya 17 ya Santu Luka: “Pelamoko esalemaki na mikolo ya Sodoma, ekosalema pe bongo na boyei ya Mwana na moto, ntango Mwana na moto akomimonisa.” Ntango emoniseli ezali kofungwama, na mikolo oyo mokili ekokóma lokola Sodoma, ekozala nini? Elembo ya Likomi yango ezali kokokisama. Nzambe azali Komitalisa polele na elembo na Ye, bilembo oyo Azalaka na yango ntango nyonso. Akoki kotika yango te.

¹²⁶ Na mikolo ya suka, Amitalisi na nzela na Mwana na Ye. Bótala lolenge nini Nzambe oyo asalaka makambo oyo ntango nyonso na . . . ndenge Ye a- . . . Abongolaka lolenge na Ye te.

127 Bato misato oyo basololaki na Abalahama, ndenge tozalaki kolobela kuna, na mikolo ya Sodoma.

128 Abraham azalaki moto oyo andimelaki Nzambe. Azuaki Nzambe na elaka na Ye. Sarah, mwasi na ye, azalaki na mibu ntuku motoba na mitano, Abraham azalaki na mibu ntuku nsambo na mitano, ntango Nzambe abengaki ye. Alobaki ete bakobota mwa—mwana; Abraham akozua mwana na nzela na Sarah. Ekoki koyokana lokola likambo moko ya koseka, kasi nabanzi ete abongisaki mwa ba—ba-sapato ya ba-bebé ná ba-epingle, pe nyonso wana, kolengela, mpo bakozua mwana yango.

129 Sima na mikolo ntuku mibale na mwambe ya liboso, ee, Abraham akokaki koloba na Sarah: “Ozali komiyoka ndenge nini, cherie?”

“Bokeseni ezali te.”

“Nkembo na Nzambe, tokozua ye, ata ndenge nini.”

“Oyebi yango ndenge nini?”

“Nzambe nde alobaki bongo.”

Mobu moko elekaki. “Ozali komiyoka ndenge nini, molingami?”

“Bokeseni ezali te.”

“Tokozua ye, ata ndenge nini. Nzambe alobaki bongo.”

Mibu mitano elekaki. “Ozali komiyoka ndenge nini, molingami?”

“Bokeseni ezali te.”

“Tokozua ye, ata ndenge nini. Nzambe alobaki bongo.”

130 Ezalaki nini? Azalaki na elaka ya Nzambe. Andimelaki Nzambe, pe azalaki kosala lokola Nzambe: akangamaki na Liloba ya elaka. Yango . . .

131 Mibu ntuku mibale na mitano elekaki. Ba-sapato yango ekómaki motane, kasi akobaki kokangama na yango. Sikawa akómi mobange, mokongo engumbami, pe nzoto na ye ekómi mpenza mobulu; pe libumu ya Sarah esilaki mpenza kokufa, pe ye akomaki ekomba. Boye oyo lolenge nini bakomaki na yango!

132 “Ozali komiyoka ndenge nini, Abraham, tata na mabota?” baninga na ye bandimi-ya-maloba bazalaki koloba na ye bongo.

133 “Ee, nkembo na Nzambe, nákomiyoka malamumu. Tokozua bebé yango, ata ndenge nini.” Mpo atengatengaki te na elaka ya Nzambe na kozanga kondima; kasi azalaki makasi, kopésáká nkembo na Nzambe, mpo andimisamaki na mobimba mpenza ete oyo Nzambe alobaki, Nzambe azalaki na makoki ya kokokisa yango. Amen. Wana nde elembo ya mondimi.

134 Bongo bino? Bomoni? Bongo biso, bana ya Abraham? Totalisamaka polele na Liloba na Nzambe, lokola elaka, pe elembo na biso etalisaka biso, ete tondimaka Yango mpenza? To,

mosala na bino bobele kotengatenga, kopumbwa longwa *awa*, ná *awa*, kino *awa*, pe kobanza-banza, pe kotengatenga, mpo na Yango? Na boye, tozali Baklisto te, tozali kaka kondima na maloba.

¹³⁵ Kasi, na ntango totelemi mpenza ngwi na elaka yango, totingami mpenza wana pe tokangami na Yango! Abraham asalaki bongo.

¹³⁶ Sikawa tomoni ete mokolo moko amonaki bato misato koya, kotambola na makolo. Biblia elobi awa: “Ezalaki na ntango ya moi makasi kati na mokolo,” esengelaki kozala pene na midí. Bato yango bayaki pe bazalaki kosolola na ye. Tososoli ete mibale kati na bango bakendeki kino na Sodoma. Nabanzi ete tolobelaki yango na mpokwa mosusu eleki. Moko na bango atikalaki elongo na ye.

¹³⁷ Bótala Moto oyo ye abengaki . . . oyo atikalaki elongo na ye, likambo nini Moto yango asalaki. Moko atalisamaki na elemba na Ye, ete Azalaki Elohim.

¹³⁸ Elohim, liloba ya liboso mpenza na Biblia: “Na ebandeli Nzambe . . .” Sikawa, bino bato ya mayele mingi, boyebi ete liloba oyo *Nzambe* kuna elingi koloba, na lokótá ya Baebale, ezali “Elohim”, yango elingi koloba “Oyo-na-nguya-nyonso, oyo-na-makoki-nyonso, azali-na-nzela-na-ye-moko,” asengeli na lisungi ya moto moko te, asengeli na ndimbola ya moto moko te; Asalaka yango Ye moko. Azali Nzambe oyo-na-makoki-nyonso, na bisika nyonso, na makambo nyonso, na nguya nyonso. Azali Nzambe.

¹³⁹ Tala Ye wana. Bongo Abraham sikawa, tata na bikolo oyo akangamaki na Liloba, atalaki Moto yango. Pe wana Moto yango apesaki Mokongo na hema, Alobaki: “Wapi mwasi na yo, Sarah?”

Alobaki: “Azali kati na hema, sima na Yo.”

¹⁴⁰ Alobaki: “Nakoya kotala yo kokokana na ntango ya bomoi, pe okozua mwana yango, oyo Nalakaki yo.”

¹⁴¹ Pe Sarah asekaki likambo yango. Pe Ye oyo azalaki kosolola na ye, ayebisaki ye likambo Sarah alobaki kati na hema, sima na Ye.

¹⁴² Sikawa, bokotángá yango, na Genese. Tomoni ete na ntango yango, Abraham, sima na Moto oyo komitalisa Ye moko polele . . .

¹⁴³ Ezalaki nini? Baebale, mokapo ya 4, molongo ya 12, elobi: “Liloba na Nzambe ezali na mopotú koleka, na nguya koleka mopanga ya míno mibale, esosolaka makanisi pe ba-mposa ya motema.”

¹⁴⁴ Ayebaki ete oyo wana ezalaki Moto yango. Ayebaki ete basakoli bazalaki te na mokili yango bobele ye, pe yango wana

nde Liloba na Nkolo eyaki epai na ye. Pe ye azalaki mosakoli, pe tala Liloba eyaki na mosakoli.

145 Ndenge moko na Yoane Mobatisi. Mosakoli moko te azalaki eumeli mibu nkama minei. Nazali komikanisela . . .

146 Ntango mosusu mobange Docteur Davis azali awa, na mpokwa oyo, mobange motei ya ba-Baptiste Missionnaire, oyo abatisaki ngai kati na Kondima. Azaláká kobendana maloba ná ngai. Alobaki: “Billy, ozali bobele mwana sikawa. Osengeli koyoka ngai.”

Nalobaki: “Malamu, Ndeko Davis, nazali koyoka.”

147 Alobaki: “Omoni, Yoane abatisamaki te. Boye ye nde azaláká kobatisa, kasi ye abatisamáká te; moto moko te alongobanaki mpo na kobatisa ye.” Oyo wana ezali likindo malamumu ya ba-Batiste. “Pe tala Yesu ayaki, na sima alobaki . . . Yoane alobaki: ‘Ngai nde nasengeli kobatisama na Yo; mpo na nini Oyei epai na ngai?’ Pe Ye alobaki: ‘Tika ete ézala bongo.’” Alobaki: “Na sima, ntango ‘atikaki’ Ye,” alobaki, “omoni, sima nde Yesu abatisaki Yoane. Pe ntango Abimaki na mai, na bongo likolo efungwamaki pe Amonaki Nzambe, na lolenge ya ebengá, kokita pe kokende likolo na Ye, koloba: ‘Oyo azali Mwana na Ngai molingami, Nasepeli kofanda kati na Ye.’” Kasi, te, ezali te mpo na kokesene ná Docteur Davis, kasi azalaki na libunga.

148 Bomoni, Yoane azalaki mosakoli, pe Liloba eyaka ntango nyonso epai na mosakoli. Boye soki Liloba ekómaki nzoto, Esengelaki koya epai na mosakoli, ata ndenge nini; mpamba te, azalaki kotatola na ntina na Liloba, pe ezalela na ye mpenza etalisaki ye bongo. Tala Liloba eyei, sikawa eloko nini esalemaki? Bobele ntango akutanaki na Yesu, Yoane alobaki: “Ngai nasengeli kobatisama na Yo; mpo na nini Oyei epai na ngai?”

149 Yesu alobaki: “Tika ete ézala boye, mpamba te esengeli na biso (ebongi na biso) kokokisa boyengene nyonso.” Yoane azalaki mosakoli; Ye azalaki Liloba. Ye azalaki Mbeka, pe Azalaki komilengela mpo na kobanda mosala na Ye na mokili, pe Mbeka esengelaki kosukolama liboso épesama. Pe Yoane abatisaki Ye, mpo ayebaki. “Tika ete ézala boye, mpo ezali malamumu mpo na biso éte tókókisa boyengebene nyonso.” Mbeka esengelaki kosukolama liboso ya kopésama, na bongo Yoane abatisaki Ye. Ezalaki te ete Yesu abatisaki Yoane. Yoane nde abatisaki Yesu. “Tika ete ézala boye.”

150 Bótala, Abraham ye wana, azalaki na Liloba na Nkolo. Liloba na Nkolo eyaki epai na ye. Azalaki mosakoli. Bongo sikawa tala, Liloba eyei. Abengaki ye “Abraham,” kasi “Abram” te.

151 Mwa mikolo liboso na yango, nkombo na ye ezalaki Abram—ezalaki Abram, sikawa ekómi Abraham. Nkombo ya mwasi na

ye ezalaki Sarai, sikawa ekómi “Sarah”, S-a-r-a-i te; S-a-r-a-h. (A-b-r-a-h-a-m) A-b-r-a-m te, kasi A-b-r-a-h-a-m, Abraham.

¹⁵² Pe Moto yango Amitalisaki polele, ntango Alobaki: “Abraham!” Oh, la la!

Abraham alobaki: “Elohim!”

¹⁵³ Tala Liloba ná mosakoli bakutanaki, elongo, bango mibale batalisamaki polele.

¹⁵⁴ Elohim, Alobaki: “Wapi mwasi na yo, Sarah?”

¹⁵⁵ Alobaki: “Azali kati na hema, sima na Yo.” Pe e . . . Bongo likamwisi esalemaki. Elohim! Abraham abengaki Ye “oyo-na-makoki-nyonso, Oyo-na-nguya-nyonso, Nzambe-ya-makasi-nyonso.”

¹⁵⁶ Yesu alobaki, ntango Azalaki na mokili, Asalaki likambo se moko oyo Elohim asaláká. Yango nde etalisaki polele elembo na Ye lokola Nzambe.

¹⁵⁷ Pe Alobaki, liboso: “Na mikolo ya suka, bobele na boyei ya Mwana na moto, ntango Akozala komonisama, likambo oyo ekosalema lisusu, ndenge esalemaki na Sodoma.” Elohim elongo na bato na Ye, Nzambe na-nguya-nyonso! Yango nde Makomi elobi. Elohim na kati ya bato!

¹⁵⁸ Esali mibu ntuku minei, Azali kobatisa biso na Molimo Mosantu, Elohim, Nzambe! Pe lingomba . . .

¹⁵⁹ Bótala, Abraham amonaki elembo moko, kobengama mosusu; elembo, kobengama; kobengama, elembo; azalaki kozela mwana yango ya elaka. Kasi elembo ya suka oyo amonaki, komonana ya suka, kokutana ya suka ya Nzambe liboso mwana na elaka ábotama, ezalaki Elohim na nzoto ya moto. Na sima nde mwana na elaka ayaki.

¹⁶⁰ Pe Momboto ya Abraham ezali kozela Mwana na elaka, Yesu Klisto. Bameni bilembo, kosopana ya Molimo Mosantu, koloba minoko ya sika, kobikisama ya bo-Nzambe, pe bongo na bongo. Kasi ntango Mwana na moto azali komonisama, Elohim akozonga lisusu epai na Momboto mokonzi ya Abraham mpo na kolakisa likambo moko wana oyo Alakisaki mokolo wana, amen, Elohim, ndenge yango ezalaki! Mpo na nini? Ekozala elembo ya Nzambe.

¹⁶¹ Sikawa, soki Klisto azalaki Nzambe: “Sima na ntango moke, mokili ekomona Ngai lisusu te; kasi bino bokomona Ngai, mpo Nakozala elongo na bino, ata kati na bino, kino na kosukisama, na suka. Misala mizali Ngai kosala, bino pe bokosala yango.”

¹⁶² Yesu alobaki yango na—na Luka, mokapo ya 17. Malamu, ntango tondimi pe tomoni mikolo ya suka oyo, likambo oyo esengeli ésalema lisusu.

¹⁶³ Yango wana, Baebele 1:1: “Nzambe, na ntango ya kala, Amitalisaki polele na nzela ya basakoli, na mikolo oyo ya suka

atalisi lisekwa ya Mwana na Ye longwa na bakufi,” na nzela ya kopesa na Lingomba elembo moko oyo Ye azalaki na yango, mpo na kokokisa mpenza Baebele 13:8.

¹⁶⁴ Nsálá moko te ekoki kolongolama na yango. Wana ezali bantsálá ya mpongo. Ekangamaka makasi, mpo bazali ba-ndeke ya likolo. [Maloba mazangi na bande—N.D.E.] . . . baleisaka bango bilei ya mpongo.

¹⁶⁵ Sikawa, tomoni ete: “Na ntango ya kala, na lolenge mingi, Asololaki na ba-tata na nzela ya basakoli, na mikolo ya suka, na nzela ya Mwana na Ye Yesu Klisto, na kosekwisa Ye longwa na bakufi.” Pe Ye oyo elongo na biso, sima na mibu nkóto mibale, Yesu moko yango, moko na basakoli te; Yesu, aeluya, Mwana na Nzambe oyo asekwi!

¹⁶⁶ Yesu alobaki, mokolo moko, Alobaki: “Libota ya nkanja pe ya ekobo ezali koluka elembo, pe bakozua elembo.” Libota ya nkanja pe ya ekobo. Ntango nini mokili ezalaki na nkanja, to ekobo pe libebi, koleka sikawa?

¹⁶⁷ “Pelamoko esalemaki na mikolo ya Yona, ndenge Yona azalaki na libumu ya mbisi-monene mói ná butu misato, ndenge moko pe Mwana na moto asengeli kozala na nse ya mabelé moi ná butu misato.”

¹⁶⁸ Na bongo, “libota ya nkanja pe ya ekobo” esengelaki kozua elembo. Elembo ya ndenge nini? Elembo ya lisekwa. Pe tozali na yango lelo, sima na mibu nkóto mibale, Azali sé na bomoi. Azali elongo na biso, na mpokwa oyo, motindo moko lobi, lelo pe libela, Azali komitalisa polele na nzela ya bilembo ya Nzambe, kokokisa Liloba oyo Alakaki kosala na eleko oyo. Amen.

¹⁶⁹ Liloba nde yango wana. Sikawa bokondima elembo yango? nde likambo ekolanda, mikolo ya suka, komonisama na Ye na nzela na Mwana na Ye. Bótala.

¹⁷⁰ Nzambe asololaki na Mose na ntango ya kala. Na Dutelonome 18:15, Alobaki: “Yawe Nzambe na yo akotelemisela yo Mosakoli lokola Ngai.” Sikawa bótala. Yango nde Liloba. Yango ezali Liloba. Ezalaki Nzambe. Ezalaki Mose te. Ndenge nini Mose alingaki koyeba yango? Azalaki moto. Kasi Nzambe, na kolobáká na nzela ya Mose, nde alobaki oyo. Bondimi yango? Malamu.

¹⁷¹ Sikawa bótala Yesu, bótala ndenge bilembo na Ye—na Ye etalisaki polele bosolo ya Liloba oyo ya elaka. Asalaki yango mpenza. Atalisamaki polele na nzela ya elembo oyo Mose alobaki ete Ye akozala.

¹⁷² Bato mingi kati na bango, lokola lelo, bazali na mposa ya komona mokambi moko monene. “Oh, oyo nde Docteur na Doctorat *Songolo-pakala*. Asilisá na Université ya Hartford.” To, “Asilisá na eteyelo moko boye ya monene mingi lokola oyo wana.” Oyo wana ezali kotalisama polele ya Nzambe te. Te, te.

Eloko moko te na yango. Liloba nde etalisaka Nzambe polele. Bomoni?

¹⁷³ Yesu azalaki moto ya mayele ya kelasi te, Azalaki pe nganganzambe te, Azalaki pe lábi te, mpo na mokili. Azalaki motomboki, mpo na mokili.

¹⁷⁴ Kasi Nzambe azalaki kondimisa Liloba na Ye na nzela na Ye, oyo ekomisaki Ye Emanuele. Yango nde ezalaki kotalisama polele na Ye. Sikawa, awa, Yesu akokisaki mpenza oyo Nzambe na ntango ya kala alobáki ete Akosala, na nzela na Mose, oyo Ye akosala.

¹⁷⁵ Sikawa bótala ntango Akutanaki na Petelo, ndenge totalisaki yango lokola lisapo na mpokwa mosusu wana, ntango Akutanaki na Petelo pe Ayebisaki Petelo nkombo na ye. Elembo yango etalisaki polele litatoli ya bo-Masiya na Ye, epai na Petelo, mpo Liloba elobáká: “Yawe Nzambe na yo akotelemisa Mosakoli moko.”

¹⁷⁶ Pe Petelo ayaki, oyo azaláká Simona na ntango wana, ayaki esika Ye azalaki. Pe Yesu atalaki ye, alobaki: “Nkombo na yo Simona, pe ozali mwana na Yona.” Yango etalisaki polele ezaleli ya Klisto, ete Azalaki Liloba oyo Mose alakáki. Petelo asósólaki ete elembo yango etalisaki polele Yesu lokola Masiya. “Nzambe azalaki kati na Klisto,” epakweli mpo na mikolo ya suka. Na Natanaele. . . Bómikanisela, Ayebisaki Simona nkombo na ye.

¹⁷⁷ Sikawa, bótala, na Natanaele, Alobaki makambo ye asilaki kosala. “Ozalaki na nse ya nzete ntango Namonaki yo.” Yango etalisaki Ye polele lokola Masiya.

¹⁷⁸ Alobaki: “Ozali Mwana na Nzambe. Ozali Mokonzi ya Yisalaele.” Atalisamaki na elembo ya Liloba ya elaka ete esengelaki Ye ázala Masiya. “Yawe Nzambe na yo akotelemisa Mosakoli moko.”

¹⁷⁹ Elenge mwasi na libulu-ya-mai, Ayebisaki ye nani ye azalaki, pe yango etalisaki Ye lokola Masiya oyo alakámáká. Bomoni?

¹⁸⁰ Ezaleli na Ye, bilembo na Ye, ezalaki Liloba oyo ezali kotalisama polele. Ezalaki bilembo na Ye kotalisáká ete Liloba ezalaki Nzambe, boye yango ezalaki Nzambe kotalisamáká polele kati na Klisto. Sika bótala yango malamumu. Bótala.

¹⁸¹ Na Petelo, Atalisamaki polele na Petelo na kobengáká nkombo na ye. Atalisamaki polele na Natanaele na koyebisáká ye oyo ye asilaki kosala. Atalisamaki polele na mwasi wana, na koyebisáká ye oyo ye azalaki. Oyo ye. . . nani *ye* azalaki; nini *ye* asalaki; pe oyo *ye* azalaki. Atalisaki elembo ya bo-Masiya na Ye, yango nde esengelaki kozala elembo ya Masiya.

¹⁸² Bótala elenge mwasi yango koloba likambo yango moko. “Misie, namoni ete Ozali Mosakoli. Totikali kozua mosakoli te na mibu nkama na nkama. Tozuaki ebele na mangomba, koswana

pe kowelana ebele ná bokeseni ya ba-denomination, kasi totikali kozua mosakoli te na mibu nkama na nkama. Toyebi ete ntango Masiya akoya, makambo ya boye nde ekotalisa Ye polele.”

183 Alobaki: “Ngai nazali Ye, oyo ákoloba na yo.” Likambo moko ya kobulunganisa ezalaki wana te: “Ngai nazali Ye.” Yango etalisaki Ye.

184 Mwasi oyo ná maladi ya kotanga makila, ayebaki Ye Liloba. Ndenge nini? Na makambo oyo Asalaki ntango kondima na ye esimbaki Ye. Abalukaki pe alobaki: “Nani asimbi Ngai?” Ayebaki ete likambo moko esalemaki. Yango etalisaki polele Yesu lokola Masiya.

185 Andimaki yango, pe alobaki: “Soki nakoki kosimba elamba na Ye, nakobika.”

186 Bongo bobele ntango asimbaki yango, Abalukaki, alobaki: “Sikawa nani asimbi Ngai?” Pe bango nyonso bawanganaki yango. Kasi elembo na Ye ya Masiya . . .

187 Amen! Nazali kolikia ete bozali komona yango, losambo. Bóyoka, wana tolingi kosilisa.

188 Kuna, asimbaki Ye. Ezalaki na bato, ntango mosusu, nkama na nkama, bazalaki koluka kosimba Ye. Petelo pe apámelaki Ye, alobaki: “Ee, bango nyonso bazali kosimba Yo.”

189 Alobaki: “Iyo, kasi moto moko asimbi Ngai ndenge mosusu.” Ezali mpenza ndenge mosusu, esimbali wana ya kondima. Bomoni? Alobaki: “Moto moko asimbaki Ngai. Ezalaki esimbali moko ya ndenge mosusu. Nzoto elembi Ngai. Makasi ebimi kati na Ngai. Nguya euti kobima kati na Ngai.” Sikawa, tala Ye wana.

190 Sikawa, ata moyekoli na Ye moko alobaki, na elobeli mosusu: “Elobeli na yo ezali—ezali lokola Ozalaki moto moko boye ya bolema. Ee, bato, bato nyonso bazali kosimba Yo.”

191 Bótala ya Ye, bótala kotalisama polele na Ye sikawa. Abalukaki, Abwakaki miso kati na bato. Asósólaki ye mwasi yango mbala moko. Akokaki lisusu komibomba te. Ayebisaki ye likambo na ye, pe alobaki: “Kondima na ye ebikisi ye.”

192 Mwasi yango ayébaki, na nzela yango, ete, Baebele 4:12: “Liloba esósólaka makanisi, mikano ya motema yango.” Elembo na Ye etalisaki polele ete Azalaki “Liloba na Nzambe oyo ekómaki nzoto pe efandaki elongo na biso.” Amen.

193 Nakanisi ete likambo moko yango ezali kotalisa Ye polele na mpokwa oyo, Yesu Klisto mosekwi oyo azali na bomoi elongo na biso na mpokwa oyo, motindo moko lobi, lelo pe libela. Sikawa, lokola Baebele 13:8 ezali solo, ezaleli na Ye ekotalisa Ye polele lelo, ndenge esalamaki na eleko wana, na lolenge moko.

194 Bótala Kleopasi ná bango, sima na lisekwa. Yesu Amitalisaki na lolenge Abukaki lipa wana, ete Asalaki yango ndenge Asilaki kosala yango liboso Ábákama na ekulusu. Pe bango . . .

Yango etalisaki polele elembo na Ye, mpo wana nde lolenge Asalaki yango.

¹⁹⁵ Sikawa soki Ázalaki awa na mpokwa oyo, Alingaki komitalisa ndenge nini? Bobele ndenge Asalaki lobi, mpo Azali motindo moko lelo, pe akozala libela. Yango ezali kotalisama polele. Baebele 4, minei- . . . 14 pe 15: “Azali sikawa. . .” Elobi: “Azali Nganganzambe Mokonzi oyo akoki kosimbama na mpasi ya bolembu na biso.” Azali Nganganzambe Mokonzi na biso sika-sikawa. Sima na lisekwa na Ye, sima na liwa na Ye, sima na kokundama na Ye, sima na lisekwa na Ye, sima na komata na Ye, amen, Azali bobele motindo moko lobi, lelo pe libela, Nganganzambe Mokonzi oyo akoki kosimbama na mpasi ya bolembu na biso. Amen. Azali bongo, sika-sikawa, mpo na mobali pe mwasi nyonso awa oyo akondima yango. Azali Nganganzambe Mokonzi na biso, motindo moko lobi, lelo pe libela.

¹⁹⁶ Azali ntango nyonso na bomoi. Bondimi yango? [Losambo balobi: “Amen.”—N.D.E.] Bilembo na Ye ezali kokoba kotalisa Ye polele ndenge Azalaki ntango Abikaki na mokili. Azali kaka na bomoi awa, na mpokwa oyo, na lolenge ya Molimo Mosantu. Azali ntango nyonso na bomoi. Pe bilembo na Ye elandaka Ye, ndenge esalaka ntango nyonso, soki Azali kaka na bomoi.

¹⁹⁷ Nazali kozongisa matondi, na mpokwa oyo, ndenge: “Nzambe, na ntango ya kala pe na lolenge mingi, asololáká na ba-tata na nzela ya basakoli, na mikolo oyo ya suka, na nzela ya Mwana na Ye Yesu Klisto.”

¹⁹⁸ Oh! la la! Nayebaki te ete nalobi ntango molai boye. Nabosanaki ete ezali bongo. Bólimbisa ngai. Nako . . . nakokata.

Tóbondela.

¹⁹⁹ Tata na Likolo, Nzambe monene atóndá na mawa! Nkolo, na—na . . . ntango mosusu nalobi mingi mpenza. Nabondeli, Nzambe, soki nasalaki yango, Ólimbisa ngai. Kasi, Nkolo, nakoki kosenga bolimbisi te mpo na makambo oyo nalobi. Nalobi bobele makambo Olobá na Liloba na Yo awa.

²⁰⁰ Sikawa liloba se moko to mibale na Yo, Nkolo, ntango mosusu moko na moko awa akomona yango na mpokwa oyo. Mwa, babeli bakobika, ntango bakomona ete Ozali kaka Nganganzambe Mokonzi monene na biso. Nabondeli, Nkolo, ete na miníti moke oyo ekoya, Ópesa lisusu bomoi na Nsango oyo na bosóló. Na makambo nasili koloba na nzela ya Liloba, tika ete elembo na Yo étalisa Yo polele kati na biso, na mpokwa oyo, ete Ozali motindo moko lobi, lelo pe libela, mpo ezali na Nkombo na Yesu nde tosengi yango. Amen.

²⁰¹ Bózela moke sikawa. Bisó, na—nalekisi ntango mwa moke, kasi bino nyonso bokoki kozela mwa moke mpo na kosala molongo moke ya mabondeli mpo na miníti zomi na mitano, ntuku mibale? Soki bolingi, bótómbola loboko, bóloba: “To . . .”

Malamu, natondi—natondi bino. Nalakaki kotika bino kobima na ngonga ya libwa na ndambo. Sikawa ntango yango ekoki; etikali miniti ntuku mibale. Bongo, soki bokopesa ngai pene na miniti zomi, nakosala nokinoki.

²⁰² Tótala naino, bakabolaki ba-kalati ya mabondeli nini lelo? [Ndeko moko alobi: “O.”—N.D.E.] O? Nini, esika nini tobandaki na mpokwa mosusu wana, moko, moko? [“Nakanisi ezalaki moko.”] Iyo, ah-ha.

²⁰³ Na sima to, lobi na mpokwa, to . . . Molimo Mosantu . . . Lelo, nazalaki koyoka, pe kolanda lisusu oyo elobamaki. Ba-nkombo mosusu ezalaki na Français, nazalaki . . . Molimo Mosantu; lolenge sé moko nakokaki kosala yango, ezalaki se kozela pe komona.

²⁰⁴ Bomoni, mbala mosusu ntango omoni emononeli, yango esengeli kobongolama pe kotiamana na lokótá mosusu. Elimbolami. Emononeli, ndakisa, okoki—okoki komona mpa—mpate, ekoki koloba nkunza. Bomoni, esengeli ózala pe na ndimbola na yango, bomoni, kobongola emononeli yango pe kolimbola yango.

²⁰⁵ Pe lobi na mpokwa, namonaki ete na—nakokaki kotánga bankombo wana ya Français te, esengelaki nátánga nkomá mookona-moko.

²⁰⁶ Na Afrika pe na bisika ya ba-Hottentot pe bapakanano yango, ná nyonso wana, Yango elingaki kosenga kotánga nkomá ya bankombo na bango malamumu, koyebisa bango náni bazali, kotánga nkomá ya nkombo yango malamumu na lokóta na bango. Bango, balingaki koyeba nini yango ezalaki, bobele na ntango otangi nkomá nkombo yango. Kasi, bomoni, kasi Ye ayebi nkóta nyonso. Azali Nzambe ya Seko.

²⁰⁷ Na mpokwa oyo, tóbanda, tólóba, na ntuku nsambo na mitano, kino mokama, na O. Ezali O, yango nde alobi? Ngai . . . [Ndeko mobali moko alobi: “Iyo. O.”—N.D.E.] O, O. Iyo. Malamumu. Nani azali na kalati ya libondeli motángo ntuku nsambo na mitano, tómona yango? Na O, kalati ya mabondeli O, ntuku nsambo na mitano, tómbola loboko, moto nani azali na yango. O nde. Malamumu. Yáká *awa*. Ntuku nsambo na mitano, ntuku mwambe, ntuku mwambe na mitano, ntuku libwa, ntuku libwa na mitano, mokámá, bóyela *boye* soki bolingi. Malamumu, ezali, bósala molongó awa, noki-noki, mpo tokozala na ntango te. Nakotia bobele elikya ‘te bokosala yango.

²⁰⁸ Tálá káláti ya libondeli na yo. Tálá káláti ya libondeli ya mozalani na yo. Bongo e . . . Pe soki moto moko azali ebósono, bómema bango awa na molongo ya mabondeli. Boye soki bazali na O, kaka lokola O, ntuku nsambo na . . .

²⁰⁹ Ntuku nsambo na mitano tééé na mokámá, bósala molongo *awa*, soki bolingi. Ata ozali wapi, na ba-balcon, to esika nini

mosusu, bókita, pe bóya na lombangu mpenza na molongo, soki bolingi, mpo na kowélisa ntango.

²¹⁰ Sikawa bino baoyo botikali awa, oyo bozali na káláti ya libondeli te, bokoki kotómbola maboko pe koloba: “Nazali na káláti ya libondeli te, Ndeko Branham, kasi nandimi?” Bótombola maboko.

²¹¹ Sikawa bómikanisela, nakolobela bino likolo na Nganganzambe Mokonzi. “Azali Nganganzambe Mokonzi oyo akoki kosimbama na mpasi ya bolembu na biso.” Azali *Jehovah-Jireh*, “mbeka epésámá na Yawe.” Azali *Jehovah-Rapha*, “Yawe oyo abikisaka bokono na yo nyonso.” Bondimi yango? [Losambo balobi: “Amen.”—N.D.E.] Azali *Jehovah-Manasé*. *Mobateli, ngúbá, kimia* na biso, Azalaka bobele yango. Ee, bato boni bandimi ete ba-nkombo ya lisiko nyonso wana ya Yawe ezalaki mpo na Yesu? [“Amen.”] Na bosóló, esengelaki Ázala bongo. Soki Ye—soki Ye. . . Ee, ekoki kokabwana te, boye esengelaki Ázala nyonso wana. Pe soki Azali kaka Jehovah-Jireh, Azali Jehovah-Rapha. Soki Azali Jehovah-Jireh. . . Azali *Jehovah-Jireh*, ezali “mbeka epésámá na Yawe mpo na lobiko,” na bongo, Azali *Jehovah-Rapha* oyo “abikisaka bokono na biso nyonso.” Amen. Kobikisama na nzoto ekoki kouta bobele na Nzambe.

²¹² Malamu, wana bato bazali kosala molongo; nazali na ntango te ya komona nani bango bazali to nini bango bazali. Kasi sikawa, bino nyonso kuna, oyo boyebi ete nayebi bino te, bótombola maboko, bóloba: “Nazali na bosenga na Nzambe. Kasi oyebi ngai te, Ndeko Branham, kasi nazali na bosenga ya Nzambe. Nakotómbola loboko na ngai.”

²¹³ Sikawa, soki bokoki kozela mwa moke, bótala malamumu, bózala na bokebi, bófanda kimia. Sikawa soki nalobi: “Bófanda kimia,” nalingi koloba te ete. . . Soki Nkolo asali likambo moko, bokozala na mposa ya kosanzola Nkolo; yango nde kokumbamela. Kasi likambo nalingi koloba, “kotámbola-tambola, kotelema-telema,” boyebi, ezali kozanga limemia. Bomoni? Pe Molimo Mosantu ezalaka na nsóni mingi, na nsóni mingi. Bomoni? Likambo nyonso ya ndenge wana esalemi, Akotika ngai, pe na ntango wana nakosengela kobunda-bunda lisusu makasi, bomoni. Kasi soki bokoyoka!

²¹⁴ Bozali koyeba lisusu elaka na Ye ya liboso? “Memá bato bándimela yo, na sima zalá sémbó, eloko moko te ekotelema liboso na libondeli.” Boyebi yango lisusu? [Losambo balobi: “Amen.”—N.D.E.] Ezali solo. Pe ezali. . . Namóná naino yango kokweya te, pe ekokweya te. Ezali Nzambe.

²¹⁵ Sikawa tokosála molongo ya mabondeli noki-noki, boye tokozua ebele na bato oyo tokoki kozua, kati na bango. Kasi bino baoyo bozali na ba-kalati ya mabondeli kasi bobengami te na mpokwa oyo, bósimba ba-kalati na bino, tokokóma pe na bino. Malamu.

216 Sikawa bino baoyo bozali kuna kasi bozangi ba-kalati ya mabondeli, bóbosana te. To, bino kuna, soki bozali na ba-kalati ya mabondeli to te, bóndima ete Azali lokola Baebele mokapo ya 4 oyo. “Azali Nganganzambe Mokonzi oyo akoki kosimbama na mpasi ya bolembu na biso.” Bótala soki Azali sé bongo. . . Bótala soki Yawe Amitalisaki elongo na bato na Ye, ndenge Asalaki na mikolo ya Sodoma. Malamu.

217 Malamu, misie. Sikawa tóbondela, sika, bózala mpenza na limemia. Sikawa bómikanisela, Liloba moko kouta na Nzambe eleki oyo moto akoki koloba. Sikawa, moto oyo awa, na—nayebe ye te. Pe nabanzi ete azali. . . Yo ozali mopaya epai na ngai, boye te, misie? [Ndeko yango alobi: “Iyo.”—N.D.E.] Ozali mopaya. Toyebi likambo moko, ete biso mibale tokotélema Liboso na Nzambe mokolo moko; lokola bato, tokokutana Kuna. Oyo ezali mbala na biso ya liboso ya kokutana.

218 Sikawa soki oyei awa, soki ozali na bokono, nayebe te; ekoki kozala likambo mosusu, bomoni. Kasi soki na—soki natieli yo maboko, nalobi: “Nkolo ákumisama! Kende, bikisama.” Ezali mpenza malamumu. Okoki kondima yango. Kasi bongo soki Ayebisi yo eloko nini ezali kotambola te? Sikawa, bomoni, wana ezali ndenge mosusu, bongo nde oyebe oyo ékotalisa polele elembo na Ye. Bomoni, oyo wana ekozala elembo na ngai te. Ngai nazali moto; nayebe eloko moko te na ntina na ye. Nauti koyebisa ye: “Nayebe yo te.” Ye pe ayebi ngai te. Kasi yango ekosala nini? Ekotalisa polele elembo ya Yesu Klisto, motindo moko lobi, lelo pe libela. Koyebáká ete ekoki kozala ngai te, ekoki kozala ngai te, mpo nayebe moto yango te. Nakotombola loboko; Liloba yango oyo. Bomoni? Ngai nayebe ye te. Ye ayebi ngai te. Kasi elembo ya Yesu Klisto. . .

219 Soki Yesu átelemaka awa, bongo ye, azali na bokono, soki alobaki: “Nkolo Yesu, bikisa ngai.” Yesu alingaki koloba na ye nini? “Nasílá kosala yango.” Ezali solo? [Losambo balobi: “Amen.”—N.D.E.]

220 “Azokisamaki mpo na mabe na biso; na mapipi na Ye tosílá kobikisama.” Lisiko mobimba oyo tokoki kozua, likambo yango esilá nye na Kalvari. Kobanda wana, ezali likambo ya kondima, kondima mosala esilá kosalema. Ezali solo? [Losambo balobi: “Amen.”—N.D.E.] Malamu.

221 Boye, sikawa soki Yesu azali na bomoi, pe nasili kolobela Liloba na Ye. . . Yango wana mpenza, kozonga na komikitisa pe kondima wana, kondima Liloba na Ye. Ntango Akutanaki na ngai na butu wana, Alobaki: “Na ntango moko, okobanda koyeba ata ba-sekelé ya mitema na bango. Soki bandimi elembo ya liboso ya loboko te, ekosengela bándima oyo.” Bomoni? “Soki basali yango te, boye makila ekolakela mokili mabe.”

222 Bobebe ndenge esalemaki na ntango ya Mose. Alobaki: “Soki bandimi bilembo mibale yango te, boye sopá makila likolo na

mabelé,” bomoni, “sopá mai likolo na mabelé, ekobongwana makila.”

223 Sikawa bobele mpo na koyeba, soki nakoki komona likambo nini ezali kotungisa yo, yango ekokoka pe okondima, boye te? [Ndeko mobali yango alobi: “Na ntembe te.”—N.D.E.] Oyebe ete ekosengela ézala elembo ya Moto oyo nazali kolobela, Yesu Klisto.

224 Moto oyo, wana natalaki ye kaka, azongi sima. Azipami na elilingi. Ezali likambo moko oyo ata minganga bakoki kosunga moto oyo te. Azali pene na liwa. Ezali solo. Basila kosala ye lipasó, pe lipasó yango ezalaki lipasó ya prostate. Pe ezali cancer, pe cancer yango epanzani na nzoto na yo mobimba. Soki ezali solo, tómbola loboko. Bobele Nzambe nde akoki kobikisa ye. [Ndeko alobi: “Aleluya! Aleluya! Aleluya!”—N.D.E.] Kasi, tala, nalingi koloba na yo likambo moko, misie. Molimo-mabe yango akokaki kobombama liboso na mbeli ya monganga, kasi akoki kobombama te liboso na Nzambe. Ondimi yango? Ondimi yango? [“Oh! Oh!”] Boye nabondeli, ete, na Nkombo na Yesu Klisto, tika ete eloko yango étika ye, tika ete moto oyo ázala na bomoi. Eloko moko te; kaka nzoto nde elembi. Malamu.

225 Ngai na yo toyebani te, mobali moko ná mwasi moko bakutani. Sikawa, lokola moto, nayebi yo te. Pe ntango mosusu, lokola mwasi, oyebe ngai te; bobele ntango mosusu osilá komona nkombo na ngai, to fotó, to eloko moko ya ndenge wana. Kasi toyebani te. Yango nde bizaleli na biso. Toyebani bizaleli te. Kasi elembo ya Klisto, Azali Liloba, pe Liloba elakamaki mpo na mokolo oyo. Boyokaki ngai kolobela yango. Boye bilembo na Ye ekotalisa Ye polele awa. Ngai natalisi Ye polele te. Ngai nayebi yo te. Osósóli. Losambo na biso—na biso ezali kosósóla yango? [Losambo elobi: “Amen.”—N.D.E.] Bomoni? Nazali—nazali moto. Nazali bobele ndeko na bino.

226 Lokola mwasi wana na libulu-ya-mai, koloba likambo oyo ezali kotambola te, likambo oyo ezali kotambola malamau te ná yo, to likambo ozali na mposa na yango, to likambo oyo oyeli awa. Tika ete Nzambe ázala mosambisi na yango. Ozali na bokono oyo esilisaka makila. Ezali ya solo, boye te? [Ndeko mwasi alobi: “Iyo.”—N.D.E.]

227 Na—nakutanaka na yango mbala mingi, moto moko azali kokanisa ete nazali kobanza-banza yango. Nazali kobanza-banza yango te. Te. Mbala na mbala, nayokaka yango, moto moko. Bokoki kobomba makanisi na bino te sikawa. Sikawa ezali na bato pene, nayebi, bato mibale ya ntembe mpenza bafandi awa. Bomoni? Na bongo bóbosana te ete nakoki pe kotánga bankombo na bino, Nzambe akoki kosala yango, boye bótika kokanisa bongo. Bótika nálakisa bino.

228 Tálá awa, madame. Tálá ngai. Nayebi te oyo Ye ayebisaki yo, kasi na—nayebi oyo Ye azali. Pe wana ezali elembo na Ye

oyo etalisami polele. Iyo, ezali bokono oyo esilisaka makila, makila, mái.

²²⁹ Sikawa, tala, tala eloko moko. Totala soki bakokanisa ete oyo ezali kobanza-banza. Ozali na mwana moko awa, ozali kobondela mpo na ye. [Ndeko mwasi alobi: “Iyo.”—N.D.E.] Ezali solo. Na mongongo na ye, azali na, [“Iyo.”], ba-amygdale, ba-adénoïdes. Abelemi mpo na lipasó. Ezali solo te? [“Iyo.”] Zua muswále wana, tiá yango likolo na ye pe ndimá. [“Iyo.”] Kotia ntembe te. Akozala na ntina ya lipasó te. Sikawa ndima na motema na yo mobimba.

²³⁰ Nsango nini? Mpo na mwasi oyo awa, likambo ezali ete ezali kobanga eloko moko. Ozali kobanga ete litóno ya mbotama ékóma cancer. Hu-uhu, hu-uhu. Sikawa kende, na kondima, pe ekokóma bongo te. Kende na yo, na kondimáká na motema na yo mobimba. Bilembo, ya ngai te; ya Ye!

²³¹ Bondimi sikawa? [Losambo balobi: “Amen.”—N.D.E.] Yango esengelaki kosala ete moto nyonso ándima. [“Amen!”]

²³² Sika, nayebi yo te. Nazali mopaya mpo na yo. Nzambe ayebi yo. Ondimi yango. . . ? Oyebi ete nayebi yo te, pe oyebi ete oyebi ngai te, na bongo ondimi ete Molimo oyo ezali koloba ekoki kozala molimo na ngai te? Mpo, ngai, lokola moto, nayebi yo te. Kasi elembo ya Liloba elakami ezali Liloba oyo ezali na mopotu koleka mopanga ya míno mibale, pe esósólaka makanisi pe bamposa ya motema.

²³³ Ozali na bokono makasi. Ozalaki na bokono ya basi, ezalaki utérus, pe utérus yango ezalaki na cancer. Pe okendeki kozua lisalisi moko boye, ezalaki lisalisi na nzela ya radium, pe esalaki eloko mosusu te, bobele kopanza yango na nzoto na yo mobimba. Pe oko—okokufa soki Nzambe abikisi yo te. Ezali solo. Ondimi sikawa ete Akobikisa yo? [Ndeko mwasi alobi: “Iyo.”—N.D.E.] Tika ete Nzambe ya Lola ápamela molimo-mabe wana, oyo abombamaki liboso na monganga. [“Oh!”] Akokaki ntango mosusu kobombama liboso na radium, kasi liboso na Molimo Mosantu te. Kende, ndimela Ye, sikawa, ndeko mwasi. Kotia ntembe ata moke te, kasi ndima.

²³⁴ Ondimi ete Nzambe akoki kobikisa bokono yango ya líkóko, pe kobikisa yo? [Ndeko mobali alobi: “Iyo.”—N.D.E.] Ondimi yango? Na bongo, kende liboso, na esengo, loba: “Natondi Yo, Nkolo. Nandimi ete líkóko na ngai esili.”

²³⁵ Nsango nini? Omitungisaka mingi. komitungisa na yo eumeli ntango molai. Kuna na kati, esili kosala mpota na líkundú na yo, yango nde esalaka yo—etungisaka líkundú na yo. Pe olingaka. . . Olingi kolia bilei na yo ya mpokwa? Okosala likambo nakoyebisa yo kosálá? Kende, liá, na Nkombo na Nkolo Yesu.

²³⁶ Ondimi na motema na yo mobimba? [Ndeko mwasi alobi: “Nandimi.”—N.D.E.] Ezali komonana ete ozali elenge mwasi malamú mpenza. Ondimi ete nazali mosali na Ye? [“Amen.”]

Ondimi ete elembo na Ye ekoki pe kozala awa, mpo na . . . Liloba, Yango moko, pe elaka ya mokolo oyo: “Misala mizali Ngai kosala, bino pe bokosala yango?” [“Amen.”] Ngai nakoki kobikisa te. Ye asílá kosala yango; kasi elembo na Ye ezali kotalisa Ye polele, ekoki koloba likambo nini ezali kotambola te ná yo. Ozali na bokono ya ba-mama, bokono ya basi. [“Iyo, misie.”] Ondimi ete Nzambe abikisi yango sikawa? [“Iyo. Amen.”] Kende liboso, ekotungisa yo lisusu te. Ndimana na motema na yo mobimba.

²³⁷ Ondimi ete nazali mosali na Ye? [Ndeko mwasi alobi: “Iyo, misie.”—N.D.E.] Soki Nzambe ayebisi ngai mpasi na yo, okondima ete ezali elembo ya Yesu Klisto? Ezali na mokongo na yo. Ezali lisusu te. Kende, ndima na motema na yo mobimba. Ndimana.

²³⁸ Yáká, madame. Yo pe ozali na mpasi ya líkundú. Ndimana na motema na yo mobimba, pe kende kolia bilei na yo ya mpokwa. Bósana yango. Yesu Klisto abikisi yo.

²³⁹ Yáká. Mpasi na yo ezali makila na yo. Ozali na bokono-ya-sukáli. Ondimi ete Nzambe akopesa yo bokolongono pe akobikisa yo na yango? Kende liboso, pe lobá: “Natondi Yo, Nkolo Yesu,” abikisi yo. Kende, ndimana na motema na yo mobimba.

²⁴⁰ Yáká. Mokongo na yo, ondimi ete Nzambe akobikisa mokongo yango pe akopesa yo bokolongono? Kende liboso, sepéla pe lobá: “Natondi Yo, Nkolo Yesu.”

²⁴¹ Yo pe ozalaki na eloko ya kotungisa yo na mokongo. Koba bobele kotambola, lobáká: “Natondi Yo, Nkolo. Nabikisami.” Ndimana yango na motema na yo mobimba.

²⁴² Yo pe ozalaki na mpasi ya mokongo. Oyebi nini na ntina na yango? Ndimana na motema na yo mobimba sikawa, kende liboso pe zalá na nzoto kolongono. Ndimana ete Yesu Klisto abikisi yo. “Soki okoki kondima, makambo nyonso ekoki kosalema.” Malamu.

²⁴³ Bongo soki nalobaki na yo eloko moko te, alekaki bobele awa pe natielaki ye maboko, bondimi ete alingaki koyoka malamu? Bazali komona eloko nini ezali kotambola malamu te. Bondimi ete akobika? Yáká awa. Natelemeli molimo-mabe oyo, na Nkombo na Yesu Klisto. Tika ete nguya ya Nzambe ébikisa mwana oyo. Amen. Kotia ntembe te, kotia ntembe ata moke te, pe akobika. Ndimana na motema na yo mobimba.

²⁴⁴ Soki Nzambe abikisi yo te, okotambola na nzete ya bibosono mokolo moko, mpo ná bokono ya mingai. Kasi ondimi ete Nzambe abikisi yo na bokono ya mingai? Na bongo kende, lobá: “Natondi Yo, Nkolo. Nakondimela Yo, pe Yo bikisa ngai.” Malamu.

²⁴⁵ Yáká sikawa. Ezali mpenza nde mibu na yo. Omitungisaka mingi mpenza. Okómaka komitungisa mingi mpenza, na butu.

Ntango osalaka mosala pe nyonso wana, ozalaka na motema ya komitungisa mpenza. Ondimi sikawa? Na boye, ekotungisa yo lisusu te. Kóba kokende liboso, kolobáká: “Natondi Yo, Nkolo Yesu.”

246 Yáká, misie. Ondimi ete Nzambe abikisaka mpasi ya motema? [Ndeko mobali alobi: “Iyo.”—N.D.E.] Ete Akobikisa mpenza motema na yo? Kóba kokende liboso, kolobáká: “Natondi Yo, Nkolo. Nandimi na motema na ngai mobimba.”

247 Nzambe abikisaka Tuberculose, Apesaka pe bokolongono. Misie, ondimi yango na motema na yo mobimba? [Ndeko yango alobi: “Nandimi yango.”—N.D.E.] Malamu. Kende liboso, na kosepela pe kolobáká: “Natondi Yo, Nkolo Yesu.”

248 Bongo bino kuna, bondimi? Bongo bino liyangani? Bino mosusu kati na liyangani bóndima sikawa.

249 Moto oyo afandi awa, azali na bronchite, ondimi ete Nzambe akobikisa mpasi ya bronchite? Malamu, na boye, okoki kozua eloko oyo osengi. Amen.

250 Tension-komata, yo oyo ofandi sima na ye kuna. Ondimi ete Nzambe akobikisa tension-komata na yo? Esili kotika yo, misie. Nayebi ye te, namóná ye te na bomoi na ngai.

251 Tala, misie, ondimi ete ba-misisa kokangama-kangama, kokangama-kangama ya misisa mpo na komitungisa mingi, ondimi ete Nzambe akobikisa yango? Ondimi? Tómbola loboko soki ondimi. Malamu.

252 Mwasi na yo afandi wana, azali kotungisama na sinusite. Yo pe ondimi ete etiki yo, ndeko mwasi?

253 Madame oyo afandi sima na biso kuna, azali na bokono ya névrite. Ondimi ete Nzambe akobikisa névrite na yo, madame?

254 Botálá mwasi oyo aláti mwa kazaka, kazaka ya motane, awa. Afandi kuna. Azali na sinusite, pe. Ondimi ete Nzambe akobikisa sinusite na yo? Tómbola loboko, soki ondimi yango.

255 Moto nyonso awa, oyo andimi ete bilembo ya Yesu Klisto ezali elongo na biso, na mpokwa oyo, tombola loboko, loba: “Nandimi yango.” [Losambo basepeli pe balobi: “Nandimi yango!”—N.D.E.]

256 Oyo nyonso azali awa, oyo alingi koyamba Ye lokola mobikisi ya nzoto na yo, telega, pe loba: “Nandimi yango.” Bótelema. Bótelema, bólongwa na ba-kíti na bino, ézala eloko nini. Yesu Klisto azali motindo moko lobi, lelo pe libela. Napesi bino yango, na Nkombo na Nkolo Nzambe.



NZAMBE AZALI KOMITALISA POLELE NA BILEMBO NA YE LIN64-0320

(God Identifying Himself By His Characteristics)

Liteya ya Ndeko William Marrion Branham oyo, eteyamaki liboso na Anglais na mokolo mwa mitano na mpokwa, mokolo mwa 20, sanza ya misato, na mobu 1964, na Ecole Secondaire Denham Springs, na Denham Springs, na Louisiana, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2017 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiamana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org